



灑  
山  
集  
附補錄遺





集 山 齋

錄附 遺補



編主五雲王

編初成集書叢

集 山 濤

錄附遺補

中華民國二十五年六月初版

撰 者 朱 翌

發行人 王 雲 五

印刷所 商 務 印 書 館

發行所 商 務 印 書 館

上海及各埠

上海河南路

上海河南路

大

◆D一四〇九

# 欽定四庫全書提要

## 潛山集三卷

臣等謹案潛山集宋朱翌撰。翌字新仲，舒州人。黃州教授。載上之子。政和中登第。授溧水簿。南渡後。歷官中書舍人。以忤秦檜。謫韶州。晚召還。卜居四明。自號省事老人。其集目見於諸書者。宋史藝文志作四十五卷。詩三卷。馬氏經籍考作三卷。焦氏經籍志作二卷。而周必大平園集又云。其子軾等類公遺稿凡四十四卷。卷目彼此互異。蓋必大所言。卽宋志之四十五卷。乃其文集。而通考所云三卷者。則專指詩集而言。經籍志又說三爲二也。今翌文集已不可見。詩集亦世無傳本。惟永樂大典各韻下所收籍什尙多。謹哀而集之。釐爲三卷。以合通考原目之數。翌父載上嘗從蘇軾。黃庭堅游。以文學見重。翌承其指授。才力又富。所作皆能力追前輩風格。集中五七古體。皆極縱橫跌宕之致。律體亦雄麗伉健。其以成語屬對。妥帖自然。尤爲獨絕。陳鶴者舊續聞。劉克莊後村詩話。王應麟困學紀聞。皆採錄其句。競相傳誦。誠以其蟠屈排奭。實足睥睨一時。與南宋時平易嗶緩之音。牽率潦倒之習。迥乎不同。周必大以杜牧擬之。殆猶未足盡其長也。今陳鶴等所摘之句。雖多已散佚。不能悉見全篇。然三卷之內。菁華具存。窺豹一斑。是亦可以存其槩矣。乾隆四十年四月恭校上。

# 澗山集卷一

宋 朱翌撰

## 雙魚花

物生本不同。所貴以形似。如何小草閒。或作潛淵類。宛然花葉分。有此尾鬣備。如以柳貫腮。十百共一帶。可肩比目鱗。與世爲上瑞。稽首蓬萊宮。願附花鳥使。

## 送山芥與徐稚山

北風撼坤軸。飛雪封高崖。萬草坐凍死。不復存根荄。蔚然蒼山底。有此紫玉斂。本無塵土侵。寧畏霜霰埋。偶爲樵牧知。遂與薇蕨偕。堅瘦故耐久。苦森終怒排。未免一時出。肯事衆口諧。可以寄樂天。時供八關齋。可以送庾郎。三代食鮭。朱門厭煖燠。嘉蔬日誰差。飛觴失行次。可口相推排。爾來走餅甕。遂費登山鞋。文昌列宿光。騎省後人佳。居官乃退步。養氣能實骸。一箸須子同。苦硬求吾儕。

## 淮人多食蛙者作詩示意

淮人爲水族。庖膾亦已巧。田閒有鳴雞。性命得自保。吳人口垂涎。捕取窮浩渺。於吳產或多。於淮求則少。要之業埒會。食債良自繞。予也家淮南。遊吳嘗草草。平生下箸處。但覺皆羊棗。不論赤鯉公。亦及長鬚老。何況鼓吹部。可作鐘鼎寶。世閒多空中。所見徒有表。至美不外示。魚鼈豈皆好。君看十月鶉。羽翼甚輕矯。

變化須臾間。不念舊池沼。食鶉乃無言。食蛙或嚶傲。鶉蛙等無二。妄想自顛倒。舌耕無盡期。所得在一飽。哀哉南路徐。食方說燔燔。但俱供芋羹。不必著錦襖。較之食齋茹。豈但能稍稍。

游月巖

赫日方正中。忽見第二月。老木盤硬枝。扶踈真桂葉。煙雲成黝晦。弦管膠盆闕。初無大小餘。可以歷沒滅。但能照行人。千古此山側。却笑天上輪。晝夜不停轍。

張翰惠書告窻

伯蓮營什一。撫掌鬼在側。燕公鑄橫財。地下萬爐熱。貧富有物司。得失難智索。我今竟日餐。或待門生設。朝區蕭菜根。篝火圍松節。黃妳坐上座。方兄行禁錮。安能挾餘波。可以潤子篋。俯視腰一圍。何時解三篋。薦福縱有碑。震雷卽驚裂。讀我送窮文。還君乞米帖。

與劉令食枸杞

周黨過仲叔。葦水無菜茹。我藥有枸杞。與子同一箸。若比閔縣令。已似方丈宮。但令耐頰香。差免腥膻汗。我壽我自知。不待草木輔。政以不種勤。日夕供草具。更約傳延年。一飯美無度。解衣高聲讀。蘇陸前後賦。王令收桂花。蜜漬培地瘞。三月啓之如新。

桂花老月窟。鹽地散金葉。長髮風雨餘。失此香旖旎。撫樹三歎息。留花姑少俟。枕中有仙方。解使香不死。蜜蜂喜輸糶。餘潤獲漸靡。瘞深閱三月。發覆驗封竊。虛堂習新觀。博山爲頰啓。初從鼻端參。忽註秋色裏。

氤氳縹緲閒。可以降月姊。自茲聞四時。何止名七里。

與郭分步至城下見田閒稻秧已可插慨然有感示郭令

端居倦來往。春去誰與娛。卷卷斗升米。俯仰東南都。薄暮喜穿屐。周遊又吾徒。念昔始經此。汙邪祝滿車。及今幾何日。立苗還欲疏。懷新無翠刻。生意蔚以舒。吾生將安之。土偶之與俱。清夜夢鄉曲。未覺田園蕪。他時招子歸。把鋤春雨餘。

重午菊有花遂與菖蒲同探

菖蒲秀端午。黃花作重陽。萬物各時行。半歲遙相望。云何忽竝開。相與同一觴。仙人九節杖。東坡一枝香。洗去仲夏熱。如逢晚秋霜。均是酒中物。俱使吾年長。莫誇雨露私。勿忘草木狂。登高閣競渡。樂哉未渠央。競渡示周宰

英雄屈大夫。遺骨淪湘沅。楚人念何深。叫空冤水妃。雖無些詞招。頗有錢鼓悲。憶昨上巳日。縱觀金明池。突殿隱負驚。長橋低臥蛻。諸公貴人來。珠幃紺幃隨。兩軍各氣焰。萬楫生光輝。龜魚戢形避。虎豹挾翼飛。想當大軍後。益覺遊子稀。況我中興君。高拱絕宴嬉。羈人老淮楚。古寺臨長溪。節物亦撩人。風俗自隨時。往來兩舴舺。規模具體微。邑人樂豐年。聚觀眼不移。捐金賞先至。頓足助絕馳。在昔攻賊具。今但娛羣兒。因而語兵法。可以威四夷。八寶水中央。大海歷左圻。其中椎剌姦。連艦揚鼓旗。先事能預防。在易則見幾。作詩示周郎。赤壁有成師。

竹枕

方牀洗湘斑。夏簟織蘄笛。誰與同臥起。青奴甚相得。嘉哉直節君。契分近愈密。深林插貓頭。乃復枕上膝。直從無熱天。徑下清涼國。早晚報平安。一覺我自適。夢中從我遊。子猷推第一。

西園月夜竹影滿堂

良夜天微暮。林閒月如篩。解與竹傳神。月娥真畫師。東坡元不死。鶴駕相追隨。習氣未掃除。戲筆聊一麾。調和水墨勻。幻出蚪龍枝。圓成不挂壁。擲地容俯窺。欲進復小卻。尙慮鞞底泥。

初直省宿

薄暮欣暑退。吏散列閒屋。冰廳冷如水。孤坐巾一幅。久絕青綾賜。僅免牀下伏。何嘗語丁寧。但愧頭蓋縮。頻年耗太倉。初夜費宮燭。枕書倦已拋。夢蝶來更速。哈嚙到天明。從人笑列宿。

次韻胡明仲見寄

去年玉笋班。仰視見樞具。論事似陸贄。任事似裴度。今年起衡山。出守非不遇。牀頭看周易。象在益長裕。解琴須更張。謀國乃疾固。要開天地爐。更使萬物鑄。可憐冰氏子。大似鐵鎖步。自謂樂於貧。公乃知其素。來謂城旦書。聊免吏部注。祝公早來朝。爲上寬北顧。

送張巨山

天方六月暑。君有千里行。相從苦不款。惜別難爲情。發軔子胥山。落帆石頭城。火雲午尤奇。水風晚更清。



輝輝發自燭。嘒嘒蟬爭鳴。今代太史氏。昔者蘭臺英。人如晉宋閒。詩與顏謝并。吾君志恢復。求士出至誠。玉堂紫微省。待子來經營。

七月十四夜月分韻得明字

澹澹煙覆渚。嗚嗚角收聲。白毫萬丈光。下注千山傾。良夜三五時。玉樓十二城。皇天老眼開。碧漢雙瞳睛。窺我讀書窗。徘徊到天明。風從樹頭來。挾我入太清。飛螢轉蒿叢。熠燿徒營營。露氣下庭宇。秀爽凌冠纓。以茲無盡景。對此不平鳴。不如使雲遮。寂歷忘吾情。

有感

退之傳毛穎。步驟過遷固。當時不入眼。怪笑且驚怖。柳州極不平。裁書細說喻。浮雲蔽兩曜。憑虛亦暫駐。何傷黃道行。終古元氣聚。嗚呼古今一。吾其秘絹素。

曉上烏石灘

急灘上水船。進寸輒退尺。老夫敢穩坐。解衣起佐刺。凡我同舟人。有力俱不惜。已濟各相賀。可以正枕席。反觀順流人。如電亦如射。艱難與快意。等是賦行役。月落東方明。雲收遠山碧。翩然兩白鷺。過眼已無迹。天地正爾寬。何苦自跼踖。脫帶且腰舟。歌我履一隻。

章質夫帥廣時以酒六壺寄東坡於惠州書到而酒不至東坡有詩傳在人口思召作廣東酒壺適居曲江亦惠六尊且云吾家故事也爲此作詩

西樞鎮番禺，紹聖之初年。覆露落南人，雅意極周旋。六尊南海春，萬里羅浮仙。先生洗破觥，使者張空拳。五十有六字，至今星斗懸。君持澤國節，我賦囚山篇。欣然故事脩，要使家法傳。禮等百牢我，情均一觴天。夜來燈有花，不憂爨無煙。但恨語無味，何以追青賢。

三月旦行園

我柳已飄絮，我筍亦上竹。雪罷密蓋地，積角橫入屋。茲辰略行園，喜色動眉綠。炎荒異中原，氣候少清淑。一日具四時，旦暮變寒燠。而我於此間，兀若蠶上簇。但愛草木長，遂使杖屨熟。喜甚得小詩，意斷語不續。尙可羊何和，不用唐衢哭。諸公幸無事，來不待休沐。牀敷三百棊，勝負任反覆。

反大涌泉入紫微洞洞乃余尋出

山川有佳處，神物嚴守衛。自非夙有因，孰敢發其秘。衆壑擁流泉，青閒見白沸。洗我杖與屨，時作深入計。要須鄉道先，行與老人值。指我洞壑已，忽不知所詣。剛崖刻巨石，稍去眼中翳。豁然大厦開，位可百人位。嵌巖一日出，自此咨遊騎。開山屬老夫，愛山必同類。甚畏長風寒，當暑皆歛袂。歎伯遂行筮，相引入勝地。歲乙丑，余年四十有九矣。因誦太白四十九年非一往不可復之句，次其韻。

南來不羸糧，隨身一竿竹。四年釣曹溪，溪水香可掬。求方駐隙駒，辟穀起黃獨。五十止欠一，何地可歸宿。今晨祖師前，一擲杯瓊下去。以六月息來期七日復，往事一局棋。信手不必覆，吾生行休矣。自此生處熟。

題劉憲十君子軒

北極元軒氣，受命惟爾獨。四方散子孫，萬里異閩蜀。戴譜六十一，巖谷無遺錄。段記三十九，冥搜出隱伏。世苦不盡見，誰爲合其族。儒林老丈人，與此淡無欲。開軒延十君，跪坐進三沐。高低列雲來，新舊開伯叔。團欒十家春，門戶各清肅。客至爲卷巖，贊名問寒燠。一見伯玉輩，遂使季子服。我欲作竹史，就君求品目。予居曲江五年，今歲又暮，慨然有感。

坐對研旁峰，臥閱屏上山。一事不挂心，萬病方窮源。吾君禮南郊，吾母望北邙。一歲幾得嘗，五年闕問安。是自取之爾，尙復何所言。手種庭下梅，花開聊喜歎。繁日既無術，縮地良獨難。

寄江東王端明

德人大江南，壺歌溫玉帳。三歲豐年玉，民倚嵩華壯。政碑滿七尺，賜蓋高一丈。平生詩有聲，行與李杜抗。餘力到行草，妙合晉人樣。如此未賜環，頗復辜衆望。前時幕下生，今作倚門翫。故國勸遠思，一夜清江漲。身如集甲卷，書自魚乙放。南風送新涼，爽氣來疊嶂。壺觴得自引，茵鼎保無恙。頗公介厚藏，中占調程粲。十月旦讀子美北風吹檣滿，羸老思散策之句，初寮嘗作十詩，因次其韻。

戰休左觸氏，夢破大槐國。肝膽方一家，燕越非異域。是中路坦平，本自無降陟。乾坤有乾坤，無極復無極。海角盡東南，天門洞西北。萬里無寸草，何人不相識。亦有鼓刀兒，大烹舉銅鬲。

其二

問學要根柢，文章忌雷同。字求反切當，義用訓詁通。縱之逼論劍，收之入攬弓。平生苦我心，不如作一農。

林間蕭灑侯，川上赤鯉公。姑從賢者樂，勿笑鄙夫空。秋宵引佳月，暑晝追涼風。如此了一生，我其塞上翁。

其三

戲語隴頭子，與若本等夷。朱紫強包裹，本非我所宜。失脚踏番山，杳杳隨風吹。將買二頃田，樹以枳棘籬。還我本來面，度今正其時。此策我自決，欲問其從誰。譬彼沈疴人，忽然飲上池。窮命可抵虎，寧畏山林魑。

其四

老火已退師，寓客不憂瘴。靜坐窺物理，一一見情狀。用起舉拂子，功成卓拄杖。五行更主事，衰絕變生王。此身屬造物，窮健勝美恙。

其五

厭晴思滴瀝，閱雨思開霽。姑欲快吾私，豈暇計豐減。身如姑射山，物物無疵癘。可笑建除家，卜日論開閉。堂堂百年中，顧已閱半世。猶鬢且友朋，百粵卽魯衛。

其六

子房憫濁世，意欲一洗爲。五日老人約，何乃數後期。功成去學仙，辟殺從清羸。豈不知自苦，反復加深維。志士極鑽仰，堅高今益彌。是爲萬世法，何止帝者師。寧知取履時，幾欲真歐之。

其七

茲辰馭北風，所至有東道。把袂問浮丘，餽芝走商皓。著裙拜木公，獻寶出富媪。氣平四大和，以此可卻老。

長生等終古。彭祖是亦夭。有客詣理窟。相過或談妙。再拜有所乞。乞我如瓜瓞。

其八

南來走炎荒。北歸定尋思。一生困坎壈。憂患真吾師。堂中木上座。萬里唯爾隨。方幸得良喜。那肯懷秋悲。但令今可行。勿愧論少卑。少時不解事。日日荒于嬉。投老又懶惰。得一或十遺。戲我過此生。造物真小兒。

其九

中夜念涼天。搔首坐待旦。北風鳴屋角。此懷忽淒斷。兒曹計伏臘。極力供井爨。憶昔冬來南。骨肉遺星散。念茲豈人爲。稍定理絲亂。呻吟裘氏地。皆是懦與緩。往語執金剛。勉力守門閤。倒囊留一錢。且免用鞭算。

其十

囚山無他謀。治生出下策。載之百漏船。吹以無孔笛。一飽久定矣。誓不爲欣戚。家山天一方。何地休行役。天其調伏予。中歲遭遠謫。養成一牯牛。露地見純白。

寄無錫諸蔣

夜帆起犇牛。烏竿鳴五兩。百年幾寒暑。兩歲五來往。竟不到惠山。閉日真難享。開道山中泉。煮茗蒙珍賞。當年京浙遷。不洗牛李黨。故人在邑中。乃漢三逕蔣。欲擊月下門。正想鼻雷響。茲山君常到。此約吾又爽。且復卜後來。歸程一陽長。

王承可有招隱黃龍之意

通途無寧軌。世網闊遮邏。九遷食肉榮。一餉在堂賀。泥深迹逾深。時過事亦過。要之鐘鼎飽。不及薇蕨餓。吾知此理明。甘作蟻旋磨。丈夫當勇決。勿使良便蹉。黃龍百丈閒。山園天幾大。往句一椽茅。撫枕得高臥。不能磨梁噫。且復縉屈些。賣藥足生理。故是伯休那。當年白鳥盟。肯爲青衫破。微官亦漫爾。棄去不啻唾。王子里中人。到處成穩坐。儻不食前言。扁舟在公左。

羅巨濟開學之西序爲軒以奉板輿之樂余名之曰難老軒

龜息六用藏。禽戲兩翼張。俛仰何自苦。要與宇宙長。深山具竈火。煮沙烹硫黃。此又出下策。中乾外徒強。我有不朽計。事具泮水章。佳哉羅江東。意師張曲江。重席坐日永。脫屣來鴈行。舉醖醉六經。抵掌談三王。青雲去一蹴。壽域開八荒。始知吾道中。大有御老方。以此施其母。何疑壽而康。煌煌忘憂花。秀色迎朝陽。願子多釀酒。容我時登堂。

徑山白虎寺

遠郭尋好山。直兆得覩徑。一重復一掩。閒度略約峻。溪聲出左方。環玦步相應。萬木儼扶持。四山擁清潤。高疑星可摘。況乃斗之分。諸公恨到晚。六月宜問信。頗聞開山老。說法起衆病。坐受於菟降。了不懷寸刃。山僧詫神通。辯口紛若磬。我豈必勝哉。渠自有佛性。

告春亭

東臯有佳致。中夜雨一犁。喜笑作春聲。麥塊青欲齊。淺瀨發清響。陳根出新萋。紅情顏未破。翠翠眉尙低。

練巾已堪岸。藜杖始一攜。殷勤道好音。胡盧來勸提。

送鄭公績赴試金陵八首

庭槐著老花。佳興渺澄江。東書望故國。飛帆響蓬窗。白袍看先登。唾手築受降。從風騰彊燕。舉火燭老龐。秋天鴻鶴高。驚到中疊雙。閩人侈青占。玉蟲綴燈缸。

其二

君到洗沐已。嫩履款北山。吾祖山中人。凜然千載顏。其旁馬鬣封。近去龍袞閒。通鑑恰施行。新經宜少閒。世上有公議。渠自明忠姦。物情有報復。天道則好還。

其三

昨日天子詔。痛念并州兒。儘有長轂動。何憂折箠笞。似聞當寧歎。頗牧今何之。豈惟一方痛。其勢又類隄。策士仍三年。側席收六奇。誰當挽天河。洗出中興碑。

其四

筆端忘耜耨。舌本貴溫潤。明明獲麟書。作世大龜鏡。哀哉東高閣。斯文久不勝。皇天開老眼。索復首拜命。秋來舉子場。誰領斯文印。向來鍼膏肓。必古司農鄭。

其五

念我客寓久。區區勞此生。借屋就瞿曇。長湖繞廂濱。未了文字債。截蒲坐縱橫。天公喜相我。既以秋風清。

他年載兼兩策勳首短髮。飢吟愧裘冠。誰知此心傾。

其六

孤城挾龍虎。盤礴納萬象。馮夷遵節制。且暮過稽顙。君今搦寸毫。意與孤鴻往。雄豪攬千古。光彩發萬丈。憶昨吏三年。到今餘夢想。古寺壁間名。勞君拂蛛網。

其七

我餅無儲粟。世累如緹纓。讀書寡見功。一飽不可營。鱗差四百指。習慣啼飢聲。天豈私貧我。客氣略已平。安能事計然。且復師淵明。儻有故人問。但如詩所稱。

其八

高軒過我數。相對心跡清。共乘殿角涼。劇談新月生。稍作連茭費。久絕壺觴傾。告我買夜航。襖被催宵征。秋晚破敵歸。連營稍休兵。青雲付一蹴。齊晉多世卿。

豹隱軒

金鏡兼花山中奇。七日霧雨人不知。一朝躍出從於菟。毛羣驚駭光陸離。釣竿在手身在野。未用聲名動天下。久幽則見理則然。世閒豈有終藏者。道人見笑皮爲災。羔裘要袖孰翦裁。男兒獨患無文爾。聖世何憂不遇哉。

羣玉亭



泗濱石窟如蟻族。巧匠琢山如琢木。不問人家與官舍。軒窗隨分作巖谷。符離城東石更多。天削神刊相倚綠。當年來過玉局翁。拄杖敲門步幽麓。翼然危屋誰所興。賜以嘉名號羣玉。翁家自有小仇池。壺中九華伴孤獨。經行趨向絕世姿。醜好例皆蒙紀錄。銀鉤爛爛照無窮。走馬來看儼立僕。是時官梅香正闌。亦有海棠紅映肉。老翁蓋棺二十年。世上遺編數遭獄。只今見字如見人。滿眼清風亂庭竹。想當入海期汗漫。雲車屢下仙山曲。仙山縹緲虛無閒。我欲憑之兩黃鶴。

大雪

漢時長安雪一丈。少陵有詩不吾誑。今年廣陵雪一尺。忍寒長作縮龜狀。從來窮巷說多泥。自是泥深勞拄杖。閉門不出動經旬。出門無路將何向。故人乃遣咫尺書。遠祝長鬚問無恙。濕薪如桂米如珠。有突不黔且踰望。但攜古鼎燒黃連。香穗流珠凝碧帳。崑崙窗閒石數峯。氣凌太華嵩衡上。黃楊冬青壓餘滋。碧嶺羽蓋排仙仗。蒼蘆賴有此清絕。興來何用山陰訪。飛鴻似帶燕山書。重冰怕結黃河浪。元冥得意愈自驕。歲律回春未全壯。吾君曲軫天下寒。語到三軍真挾纊。自憐難備絕域使。規模但可山中相。起來舉手祝羲車。何日金籠開眼障。

溪南大雪示常子正

王者有德琪樹生。兵馬欲洗銀麩出。天將以寶奠中原。何用真如傳恍惚。沙塞汀冷鷺啄冰。藻暖餌香魚近罾。梅花抱葉不肯吐。傲衽且讓天花升。朱門歌呼正圍妓。江上獵圍飛鐵騎。惟有書生無所爲。下帷煮

茗候湯沸。

用禁物體書雪

宵分獵獵風翻幃，平明漫漫雪擁扉。高妝老樹枝不舉，深壓野畦根漸肥。削平履迹頃刻盡，吹落楊花從來稀。飢烏大有在陳厄，循階入戶冷不飛。我曾倚賴東風暖，騙兒出市典綌衣。不料元宴賈餘勇，小窗無地逃寒威。起來博爐薦軟火，敢營肉陣張妓圍。認香尋梅亦不惡，敲冰煮茗寧皆非。掃除習氣幾時了，忍寒琢句聲益微。東坡先生六一老，當年格法誰遵依。不量吾力效跋躐，從今望炙晴簷暉。

韓幹二馬圖

飛龍翔麟夜不關，房星之精下人間。一鳴墮地勢千里，四十萬匹中如山。皇天生此意何在，天意有在平百蠻。百蠻款塞皆稽首，干戈包盡於菟斑。翦成三鬣代官字，濯之太液登王閑。紫壇謁天玉使出，玉帛扶日雙輪還。寶鞭不用繡韉穩，扇篋前開曲蓋彎。方知徐行備天仗，絕勝疾走周人寰。開元距今四百載，人物風流無一在。如何兩驥今尚存，好手傳神能不壞。請從此畫究規模，便見當時似三代。

人日雪

天公號令今年早，阿香動地速催曉。今朝纔及七日人，卻見長空六花擾。我獨博爐坐畫灰，扶杖出門愁履倒。細挑生菜藻鼎香，落盡梅花妝額巧。詩成思發在花前，更願晴多怕晴少。君不見貞觀有道變成康，誰其致此唐文皇。一時獻納盡豪傑，鄭公臣徵尤激昂。當年入見適此時，見謂人日宜相當。有如此人當

此日整頓乾坤纔頃刻。

夜夢與羅子和論藥名詩

鑽破故紙我拙計。該貫叢書子得意。籤排百部象齒懸。陟釐萬張蠅頭字。分甘遂如百兩金。作苦耽成五車記。地錦天花出妙機。瓊田水英生爽氣。詩成欲度甫白前。冠彈請繼王陽起。天門冬夏恣尾翔。香芸臺閣龍骨蛻。任真朱子老無用。得時羅君政如此。今宵月白及風清。想君不作呼盧會。泉石膏肓肯過子。飲量定能加五倍。

吳道子華清宮圖

霜清十月天無風。行宮繚緜祥雲中。重宣繡嶺光相通。莊嚴具足無遺功。泉鳴三湯春灑灑。合歡阜筵雙垂紅。人間塵垢一洗空。玉華瓊然出房櫺。鸞吟鳳舞紛層空。豈不大勝遊月宮。向非道子妙絕筆。那見開元全盛日。槎牙老木青銅柯。坡陀巨石蒼玉質。石言木應若可聞。阿房興廢纔頃刻。乃知吳生有深意。一時心事能貌出。臣非丹青好畫師。臣以畫諫乃其職。此山此事姑置之。此畫當今須第一。

觀獵會圖

一日射雉六十三。命中要是人所難。一日射虎三十六。驍勇無前誰不伏。沙平草軟雪沙乾。手拓弓弦腰兩鐵。祥麟選馬捷若龍。翻身已墮雙飛鶴。拜賀將軍箭有神。麾旗拍鼓轟相逐。錦襖大袖挂虛堂。勇夫視之心發狂。不如緩帶罷車上。舉酒割鮮殊不忙。

送硯與周宰

巧匠斲山取山骨，媿神拱手不敢情。因隆作防瘥作池，以金爲聲玉爲質。藉以縹衣便絮攜，置之烏皮長拂拭。憶昨隨計西入關，太學三年同寢食。晨昏綴緝困蠅頭，歲月磨研取鷄肋。時來偶題千佛經，吾自無功子何得。祇今懶慢大可笑，身外了然無一物。經時不脫管城帽，子宜不賜湯沐邑。我今容子乞身去，卻到安宜宰君室。宰君真是蕭灑人，文章機杼乃自出。陳元毛穎費追呼，子堅而厚宜比德。從茲去給上方札，便當入珥靖切筆。切勿勸草封禪書，亦莫上獻開邊策。願君發明錯與諠，昨奏條畫今所急。忠言讜論聞四方，硯乎汝爲不失職。

簡宗人利賓

昔時桐鄉漢九卿，家在淮南天一柱。石麒麟冷一千年，子孫不敢去墳墓。我之曾高主宗盟，昭穆亦與公家敘。不容妄繼鄴侯蕭，何嘗敢掘城南杜。深山大澤慙劫灰，甲第名園走狐兔。飄零直見似人喜，何況乃與吾宗遇。爲善本求鄉里稱，浩歎正坐儒冠誤。出參留守入坐曹，抑亦爲此微祿故。灤山高濞水深，眼前誰作藩籬護。心隨大信小信潮，夢遶長亭短亭路。生涯舊欠錢一囊，歸裝或有經五庫。今子新從彭澤來，歸去來兮幾時去。一杯且透客枕安，百尺竿頭同進步。

觀諸公打馬

酒酣侑坐展博局，分曹竝進角馬足。過關驗齒出天衢，入關未掩纔日軸。十驥并驅縱來往，一將折筴制

起伏擊前疊後看騰驤。避暫守狹良局促。緩時必若出門殿。妙處正須蟻封逐。孫臏能令田忌勝。諸人徐賀塞翁福。障泥在前解則行。杜蘅可采帶宜速。莫疑檀溪墜三丈。終使青雲成一蹴。吾家款段乃如狗。敢上夷塗陪驢馱。但能書與尾而五。未免以策數曰六。歸歟秋滿華山陽。苜蓿倍收連苜宿。

聞鄰舟琵琶

橋烏逐風不停飛。尾燕掠水東復西。螢弦金撥竊私語。行客轉頭聲更悲。擾擾雲吹寶鬢綠。新粧半隱朱簾曲。無限柔情指下生。誰道彈絲不如竹。谷兒指法來帝城。曹供奉傳新曲名。香山居士家有此。何況更聞江上聲。路轉溪回雙櫓咽。彈盡胡笳十八拍。山頭日落暮潮平。一帶荷花白秋色。

石斛栽蓮

數夕一夢吳松江。兩槳飛度荷花鄉。列中山骨泥數斗。趁兩屈盤三節藕。鏡面光寒溢井花。四顧無人下渴鷄。老翁真箇兒輩似。我非韓公亦兒戲。綠蓼亭亭忽獨立。靡蹊不隔香直入。宛若船舫坐促膝。遂使江湖在方尺。雖無太華藕如船。定有廬山房似笠。此遠載。齊已於廬山。得蓮房大如笠。

端午觀競渡曲江

揀花角黍五色縷。一弔湘纍作端午。越人哀君機迎汝。呼聲動地汗流雨。魚鱖走避無處所。小試勒兵吾有取。樓船將軍下橫浦。飲飛射士躡強弩。大堤士女立如堵。樂事年年動荆楚。卻憶金明三月天。春風引出大龍船。二十餘年成一夢。夢中猶記水鞦韆。三軍罷休各就舍。一江煙雨朱簾夜。隱隱灘聲細卷沙。沙

淺灘平雙鷺下。

南園用端中韻

有韓太尉淮陰家。十年種木今開花。松陰漸可張翠葆。桃蹊久已蒸紅霞。早來雨過著芒屨。曲沼鏡平清見沙。道人從我似支遁。公子立名非務華。劇談坐致千歲日。默誦初無一字差。主人負重守且將。一手撚箭腰黃蛇。因來小集休沐地。何時共聽歸來笳。飢腸欲餽枕榔粉。香身要采毘陵茄。涼風愴愴引佳月。歸興忽起從淒鴉。誰憐老我夜不寐。兒曹見祝無多茶。

八月十四夜對月效李長吉

雨江洗出揉藍天。結璘下鋪白玉筵。尾箕牛斗珠一穿。連暉接影墮我前。整襟危坐天地默。不知夜漏下幾刻。飛螢一點從外入。白露下濕桂子香。藍橋雲英正賣漿。金盤荔枝能眼雙。

題校書圖

我聞校書如掃塵。塵隨帶去輒隨有。益窗孤坐志不分。帝虎魯魚相可否。榻上諸公富貴人。安能辨此鉛黃手。綠柳啼鶯耳畔春。翠袖彈絲眼前酒。如何復窺蠹簡塵。又借管城公作帶。畫史畫名不畫寶。潤色丹青傳不朽。我是瀛洲舊校書。揮汗磨鉛膩兩肘。當時萬一見此圖。諸郎不免涎垂口。

寄張子公

政和聖人拜賢書。陸贄春曉傳天衢。集英殿下八百衆。一時如公此策無。萬口一詞期第一。擢之第三衆。

不憚。諸公貴人頗相識。戒關走馬要君入。君言不媚有藥石。國子先生乃例得。我亦跪起就穿執。妄意得蒙子公力。六年一別安宜北。憂患壓人氣不出。聞之減米符離日。首陽激貪用一律。嗚呼四海鳴鋒鏑。白晝豺狼恣吞吸。帝在奉天頗倉卒。絲綸政渴宜公筆。械情遠附雪原鵲。願公來。慮巡而躡。平泉松菊淩霜碧。伐叛亭成燕賓戚。起居因書問晨夕。宜爲蒼生調鼎食。

方提幹有端石硯池狹不能容水予攜以歸令匠者廣之疑其不返也嘗來見督以詩解嘲

端溪有石紫玉潤。未遇良工失追琢。眇哉池面劣容指。水至不能容一勺。潛山道人請歸治。要使墨池少開拓。每煩健步遠來徵。事必不然空臆度。子如不忘一塊石。予亦敢負千金諾。會令合浦看還珠。豈忍荆山長抱璞。一毫不敢我非有。萬頃難量子宜學。聞道年來好說禪。初機最忌多貪著。認爲己有大謬。久假不歸非爽約。均之在此猶在彼。弟兄四海何曾各。笑傾萬斛付江流。所有盡空心境廓。請對使者一斧碎。與公少解貪癡縛。

謝人寄硯

老矣捐書臥看屋。尚記姓名供簡牘。倉皇去越著南冠。頭已如蓬口生沫。無因可結孔方交。有藥唯醫管城秃。新涼稍與燈火親。學字頗慚蚯蚓曲。羅紋重厚使守舍。銅雀不異非所蓄。敢遣良工開下巖。要使珍材過天日。君家舊物多錦藉。聲若鏘金眼鸚鵡。前者一見首重藉。回視他山真碌碌。公今遣一從我遊。謹當配以螭螭玉。

諸公勸楚真叟應進士舉以詩勉之

太祖皇帝龍飛初，君家樞密推日車。一時事載太史筆，九廟畫展功臣圖。昭陵取士極妙選，乃孫應詔從諸儒。威加草木部刺史，屢進藥石諫大夫。誰知冷落百蠻裏，忽見其後清而腴。讀書過眼似皎月，裁詩出手爭秋葉。諸公力請舉進士，駢四儷六子有餘。三經新義未改科，一代元老出此塗。要令我才必有用，不憂此口無以餬。他年上國與計偕，看日五色傳天衢。

謝人惠淺灘一字水圖

風行水上初如織，任使蕩雲高沃日。屏翳歇去偶夷歸，本體湛然無損益。風本無形不可畫，遇水方能顯其質。畫工畫水不畫風，水外見風稱妙筆。清泉道人乃了此，筆下淵源心自得。斜斜一字淺可揚，渺渺橫灘晚尤急。規模上擬蜀兩孫，妙處直度吳諸戚。老夫老矣不觀瀾，但愛潑漣才咫尺。面聽注目風蕭蕭，漁浦西興待晚潮。縱貧那肯折波濤，還渠并州快剪刀。

過秀野亭觀趙昌花

牡丹醺醺送春歸，南風亦復吹戎葵。青女不瘦芙蓉肌，雪中山茶火爭輝。此間彼落相背馳，安得坐隅皆見之。劍南老人來解衣，好手不免如徐熙。蕭然四幅十二枝，規模一出衆史卑。妙處天授非人爲，右軍字畫少陵詩。後來縱好難竝馳，傳觀左右識者誰。愛畫入骨吾一癡，惜哉不獲坡谷題。何妨擾擾俗眼疑，秀野前後花成帷。按圖求之君自知。



簡韓仲朋

老范好客老更豪。長恨無人陪痛飲。我嘗解帶坐南軒。閉門投轄則大窘。小韓云是故人子。酒量直須吞萬頃。昨宵風雨送秋來。雨罷月林散清影。想當一口吸西江。看撫朱絲移玉軫。誰將五斗爲解醒。螺螄蛤蚶供一晒。野人無酒可留公。一酌山泉薦佳茗。

謝方務德惠粟麥

投閑閉門且隱坐。動輒有礙天難測。錢神不肯赴招要。瘴鬼乘時作寒熱。要之貧困真吾道。一一爲向兒童說。山中宿麥舊爲農。餅無儲粟今何措。飯糜不掃麤未燠。米糞自從仁祖索。元英之孫陳義高。急遣樵青分粟麥。細春落落簾珠圓。退磨紛紛飛玉屑。粥香恍若在僧坊。麪熟又將思水厄。從來養食不謀國。飢卽須餐困仍歇。笑殺多牛足穀翁。何用詩腸生錦襪。

耘村麥熟

君不見五經紛繪井大春。不得已見陰將軍。將軍故爲設麥飯。推云不食言非誠。又不見劉懷慰作齊太守。廉吏籍中自稱首。邦人饋米不肯取。示以麥飯吾所有。我有郭內一畝田。帶經荷耨願有年。今年麥熟始一飽。久飢客子俱來前。姓名久與市朝絕。將軍薄飯不吾設。亦不彊學劉公清。但使兒曹知稼穡。

題孫倅面山軒

舉頭直北看青山。低頭直下覩黃卷。黃卷辛勤有時厭。青山於人保不變。山作主人我爲客。主人看客長

不憊。今代風流漱石公。吏事直以儒雅緣。一丘一壑在胸中。塵土汚人聊舉扇。開門拄杖扶舊題。勝坐與烏龍通一線。近因秋雨聘此君。更倚歲寒爲外援。賤子與世多背馳。只有青山存半面。莫嫌剝啄時扣門。要

高風堂

一溪之雲各爲雨。聊與蕭王分出處。亂山深處有生涯。三尺漁竿一枝觴。細讀懷仁輔義書。先生於世未嘗踈。我已飄然遺物去。斯言卻以告司徒。參政樹碑頌遺德。舍人作堂認無極。高風之高幾何。下視烏龍六千尺。

洞霄宮


委委曲曲山九鎖。巍巍堂堂天一柱。靈官跨龍出洞來。仙人驅虎戴箬去。崑山泉流兩山鳴琤瑛。夜壇星辰可手撓。世閒何限真人祠。身未嘗到銜空結。一日來遊豈偶然。草中更識天荷葉。

羅教授不赴真叟觀李花之約已而有詩次其韻

廣文著書不羸圓。刻杯以玉露以繁。澹乎不羈俗士罵。雅意要令吾道尊。那知韓賦李有花。常以博士居四門。老夫卻欲來不速。但恨人靜鐘鳴昏。明朝未必遽零落。往看花上春風喧。更語宗文與宗武。詩成入耳宜不煩。

觀弄獅子

後視日走二百里。於菟聞之望風靡。春晴酤酒大合樂。乃向尊前應宮徵。嘯呻奮迅左右顧。樞馬悲鳴汗  
流水。供官自古藏太常。失腳何年落村裏。佛居勝義空谷中。吼法佈魔如此耳。人閒宜假不宣真。此理吾  
今得之矣。



# 澗山集卷二

## 賀陳內翰去非三首

聞道催宣召，傳呼入翰林。堂高初上玉，帶重更垂金。煩悉周公誥，丁寧葛亮心。調元知有日，天意向君深。

## 其二

夢獲生花筆，祥開視草儒。奉天專仰陸，元祐只傳蘇。蓮影光分燭，絲紋細結絢。禁中頗牧在，夙夜贊神謨。

## 其三

夜到甘泉捷，光搖建曉魁。唐家方再造，漢德已重開。太史書雲後，羣公賀雪回。十行寬大詔，早晚出銀臺。

## 出城

少策經營飽，多方處置閒。樵談消一日，野坐看千山。白鷺連飛去，微雲時復還。展開新樂地，攻破舊愁關。

## 城上觀月

月上孤城早，山迎雉堞低。四天浮沆瀣，萬瓦貯玻璃。松獵風聲北，江搖斗柄西。諸公宜款曲，吾且倚枯藜。

## 示葉令

舟楫三吳客，江湖二月寒。交情元自淡，酒味莫嫌酸。日者坐何事，君乎能自寬。不來同一醉，何以解憂端。

## 示李令

春色遽如許，春愁無奈何。看山連楚越，端坐惜羲娥。吾子頻相見，新詩苦未多。試穿一兩屐，從我上煙蘿。

輪中坐睡

飽食登長道，鞭輿枕臂眠。鼻閒真栩栩，腹外亦便便。徒倚兩竿竹，吟噓四僕肩。忽然成小憩，放手卽醒然。

寄王承可

耕甚王郎子，揚州一再逢。至今清夜夢，猶在笑談中。想見芙蓉句，空懷楊柳風。著鞭來不晚，聲價動諸公。

寄葉應之

人老江湖外，官拘簿領緣。劇談常共夜，好句得先傳。行李無他阻，朝廷有闕員。相逢一笑喜，已種玉爲田。

寄符正民

體力今何似，兩書闕到門。匆匆緣不暇，負負復何言。此日忘疎遠，明公實見存。捫參懷蜀道，叱馭憶王尊。

五更不睡

播罷城頭鼓，齊凝燭下檠。留留三尺月，續續五更寒。事事華巾結，年年紙帳寬。梅花正好在，青女莫摧殘。

曉出

浩蕩乾坤曉，淒涼客路窮。小舟輕破浪，宿霧密糊空。累重苦無飯，時危甘轉蓬。但聞淮上賊，不敢視江東。

初到曲江六首

度嶺三百里，攜家五六人。卜居依古寺，愛日向初春。時有逃虛喜，端無去客嗔。團圓何所作，不察守庚申。

其二

昭代人無棄。遐方住亦堪。司分大火舍。官作世男南。守拙休心匠。忘憂縱手談。平生不喜鬧。所欠一茅菴。

其三

燈火光元夕。歌呼亦盡歡。欣聞雪霏白。愁失勢垂丹。老酒蓮花麴。甜魚菴葉漿。萬金書若到。便可解憂端。

其四

嶺外山川最。天涯草木芬。曾經五月狩。俱被一琴薰。留石靜張樂。舜峰高出雲。真同適魯見。何異在齊聞。

其五

草斷城頭路。春來屐屐穿。雨餘蜂染黛。雲出嶺垂蓮。眼傍青林轉。愁來白鳥邊。中原好消息。問取此江船。

其六

嘉卉懷炎德。孤根幸斗臨。象蹄交綠潤。佛眼瞬紅深。含笑香飄坐。素馨嬌滿簪。老榕雖擁腫。六月十分陰。

丙辰人日雨雪

此地從來僻。今朝白古陰。五年猶作客。一飯敢虛襟。春色豈終闕。晨光宜早臨。國香無恙否。抱雪秀深林。

有惠曾公逍遙樓字者

蒲阪今灰燼。茲樓亦草萊。如何三字大。却到百蠻開。屋漏其能爾。霜嚴可畏哉。置之當座右。親手拂塵埃。

次韻胡明仲見寄二首

胡示辨  
正論

雙鳥鳴方盛。公今遂著書。浮雲供一掃。直筆用三餘。孔孟揚韓道。乾坤日月如。平生擊盜手。發蹤去自桐廬。

其二

柳州非國語。意恣亂詩書。去草絕根本。立言推緒餘。斷疑先近似。反已問何如。歲晚飄零甚。歸歎指敝廬。

歸自南華

衆綠揚新楚。初晴中薄寒。行山無闊步。陟嶽有遐觀。巖紫攀猶小。松黃粉漸乾。無嫌一馬瘦。徑度兩重灘。

南華具素飯烹茶

頗有客倉卒。初無具咄嗟。家貧難辦素。人衆不烹茶。此老來修供。茲辰竝拜嘉。小船橫一笛。風引入荷花。

南華道中

小市荒隄轉。湧泉春水慳。頽經石角鋪。不上馬鞍山。橋斷衝泥過。松摧塞道艱。草糝半踏雨。更著一囊還。

晨起

曉日光穿戶。衡門起及晨。簷垂冰折柱。澗湧雪鎔銀。臘取一時樂。春期數日新。曝書仍曝背。自笑巧於貧。

遣興

客去抽書讀。愁來閉戶推。眼花因酒劇。書草更人催。怪石巧依竹。淨瓶香引梅。悠然鑑湖念。又向鴈邊回。

次韻張巨山正月十日遊天竺



欲飯雲邊寺。先尋湖上春。山川良是舊。歲月又更新。草長煙如積。梅晴粉自勻。久留知不可。暫過却須頻。  
猶覺寮晚飯。

卒律葛答美。鉤鶻格磔肥。翁川茶不媚。何氏酒今非。硯水添池淺。碁盤下子稀。姮娥憐我獨。未暮款窗扉。

卒律葛答  
• 煎餅 •

歸去來園南鄰劉家菜圃近許闕路相通

假道趨南浦。排牆度小溝。仙人中謫李。鄰里外依劉。良友經時集。清貧覺我優。檳榔初不設。佳茗或相投。  
雨晴吳李過園中

聯壁來吾隱。交歡只賀晴。酌泉心不易。指李話平生。萬木翠光合。一池春水平。更詢消遣法。元自不容聲。  
告春亭三首

一丈寬鋤地。三重客蓋茅。分封鷓鴣境。拾翠芰荷坳。正爾賓中主。居然國外郊。老來俱倒置。營圃不營巢。  
其二

竟日成清坐。因行或撫松。巒陰連曲浪。木杪涌奇峰。要路看公等。閒鄉屬我儂。未春花已盡。春到若爲容。  
其三

自斷身將隱。無嫌論少卑。江湖雙桂棹。天地一茅茨。溪篆行蝌蚪。林妝嚇畫眉。悠悠昏復晝。聊爾給其私。  
地僻

地僻門常閉。家貧客自疎。溪山行老我。風月不欺予。謾有書成詔。端無貨可居。清江千里道。持此問春鉅。  
種黃菊

白日始欲寢。黃花能起予。妙香來枕上。正色立霜餘。護外勞編竹。培深更荷鋤。收功歸我枕。洗眼讀殘書。  
重陽不見菊次諸公韻六首

我圖黃花晚。君行不下輿。屏居甘寂寞。佳節愧空疎。小待西風急。頻遊夏屋渠。開時卽重九。那恨子來徐。  
其二

遲笑秦昭舅。吝譏和長與。當時雖說貴。退步不爲疎。莫實采重嶺。拒霜臨碧渠。梁王門下客。先後有嚴徐。  
其三

歸去思陶令。安時似子輿。近知園可灌。唯恐菊相疎。酒幸濃如垆。詩令價重渠。看花隨早晚。何必更因徐。  
其四

菊以黃爲正。紛紛紙阜輿。待寒緣耿介。縱老不凋疎。秋淨花如染。時遷水走渠。惟留五字句。能不愧應徐。  
其五

風流人稍閒。涉筆爲題輿。今我思黃菊。攜君近綺疎。先秋飄桂子。出水老芙蓉。俯仰俱陳迹。聊書歲執徐。  
其六

西風吹露晞。晴日飭香輿。羨彼根莖茂。憐子齒髮疎。功成身老健。重味笑軒渠。甘谷誰能汲。瓶罌走莫徐。

予多種甘  
菊入藥。

十月十四日立冬菊花方盛

黃菊一何好，持觴惟爾從。名應稱晚秀，色豈爲人容。正似花重九，休論月孟冬。霜威占清曉，直欲犯其鋒。

夜雪

夜集羣山雪，寒欺一把茅。紅爐無宿火，黃絹有新鈔。坐久燈排粟，杯行橘解包。頽然投敗絮，老懶信兒嘲。

謝翫倅寄佛面杖

自得閒居樂，欣聞隱具來。杖頭觀佛面，掌內化龍才。行變黃金色，依然滿月開。從今不妄出，留上妙香臺。

遣僧澄收刈瀟陽

下溲田將穫，東屯稼亦收。厭煩吾老矣，爲衆子行不。一粒生何處，千箱慶有秋。灌溪明日飯，今日已無愁。

送楊亨仲還建康

湖海重相面，干戈早脫身。亦知懷琬琰，寧肯就風塵。船泛東湖夜，梅尋故國春。毛錫有持護，如子豈長貧。

金秀軒

金秀皆垂類，山園特有光。索牛高暈碧，滴露小勻黃。老讀離騷傳，兒尋急就章。杜門觀化物，吾得做羲皇。

過王監園

爲問西園客，秋花餘幾何。敲門容剝啄，此老正婆娑。十月爲春酒，今年得子鷺。舉杯邀月罷，擊缶仰天歌。

戲事

相逢多戲事，聊以度長年。開出詩聯句，時因酒合錢。歌狂無所擇，某勝亦欣然。齷齪好苛禮，逡巡不敢前。

牡丹次韻二首

一日春工過潁陽，名園次第款侯王。風流得見昇平瑞，氣味初無世俗香。早託筠籠馳驛騎，旋張羅蓋護晨光。最憐一尺盤，孟玉穩上高鬢映頰黃。

其二

畫舫何須載西子，青裙今幸拜東王。佛談非想色界色，天造玉皇香案香。興慶池邊凝曉露，善和坊裏借餘光。行聞綺席開東省，飛鞚爭馳御道黃。唐東宮有看牡丹宴。見南部新書。

跋司馬才仲六論

溫公言語藥石譜，猶子文章星斗羅。家世有方能治國，宦遊無地可降魔。諦觀深切著明論，平視賢良方正科。四海共知勳室後，享年孰似賈生多。

題蔣山草堂

俯仰之閒迹已塵，重來屐齒辭痕勻。晚襟早韭有真味，夜鶴曉猿無故人。萬一可償他日願，再三須卜此山鄰。北山大士乃吾祖，添蕙肴蘭長薦新。

約徐令登妙高峰徐不至

衙鼓聲中百事休。獨攀危磴看江流。君修吏課中中考。我且山行上上頭。下視三千佛世界。高尋十二仙人樓。聞思大士誰呼應。願賜飛霖洗旱眸。

後兩日葉幹攜酒至

喜君醴酒吸鯨空。置我飛雲卷霧中。蒲鴿青浮初落蒂。冰蠶繭就旋開籠。小涼已覺生衣怯。短策能尋熟路通。直上高臺延望眼。萬山橫浸一溪東。

題水雲亭劉升道福唐所居

沙合南臺會有期。沙邊築屋俯清漪。宋香陳紫丹成後。渭綠湘斑族盛時。長者時懷流水念。老兄元愛白雲知。一塵不到忘言處。雲在青天水在池。

雨後登城上亭

何堪濕熱坐支離。且就虛涼看劇棊。避雨唯應急走耳。登城願向少休之。江山政此成三絕。耳目醒然亦一奇。突兀小亭吾畫篋。眞形妙境恣君窺。

觀李思訓幸蜀圖

上青天路最崎嶇。藏日曩天却有餘。既驗六龍行萬里。始知一卒當千夫。望雲雕鞮無前馬。帶雨鈴鳴動屬車。縱有將軍天下筆。不如無逸舊時圖。

顏魯公畫像

結芻糲體祭中丞。鬼質何爲苦見嘯。千五百年如烈日。二十四州惟一人。朝衣視坎趨前死。羽服行山卽此身。賴有區區張孝舉。直言驚倒漢廷臣。

讀太真碑

袞衣華藻刻堅珉。下馬來尋劍蘚痕。斷畫豈如弦可續。闕文納冀石能言。窺村故址今仍在。螭首遺蹤碎莫存。欲較智愚三十里。又飛絲鞵過前村。

黃守不飲茶

賓客相傳無水厄。欣然脫履上公堂。滌煩療渴名雖著。瘴氣侵精暗有妨。夢寐無憂眠可熟。清虛自積體尤強。樵青竹裏管何事。側聽盃行供煖湯。

寄范伯達

薰風永日一簾垂。剝芡從容待晚炊。舉白且看連引滿。汗青不用歇無期。晝思夜夢人非遠。客附書來喜可知。千里與公供一笑。何時相遇戰低基。

次韻劉美中早朝

鳳凰山下鳳凰城。葦路凌霄迥紫清。秋入九天風露冷。雲藏五玉佩環聲。虞淵出日升黃道。織女斜河轉啓明。鬱鬱安能久居此。君王有意待還京。

題日涉園

一葉黃時秋氣清。三山轉處大江橫。禽魚自有親人意。草木皆能識履聲。晴望高崖尋李愿。酒行半道致淵明。將詩與結江山好。他日來遊分不生。

寄胡明仲

尺一催公想疾驅。盛傳今已過光遠。紛紛眼底何時定。鬱鬱江南更久居。陛下不妨高枕臥。先生來草射聊書。銅駝可惜埋荆棘。會有人能爲掃除。

送王端材以宣諭屬官入川

使星入蜀動佳占。幕府謨謀要子參。天下兵戈連歲月。朝廷根本在西南。路經九折休回首。事考三分小駐驂。想見梅黃飛雨裏。前旌已在百花潭。

方竹杖

此君骨相一成矩。氣稟神爰六二全。運用四方隨手轉。操持一節比松堅。玉雕界尺疑同樣。金作觚稜笑削圓。見寄分司真得力。時將緩步與周旋。

萬竹亭

東坡名文  
與可畫

氣稟元軒玉立身。露幢煙繖曉初勻。一時頓有七賢集。千畝今餘萬箇春。能以風流誇後日。政緣名彖得斯人。寂寥不見平安報。只有東風爲掃塵。

頃入南華僧仲有詩爲次其韻仲欲見予詩集

促駕難求馬一尋。行纏快走任山深。上方首入文公禡。小語能披逸少襟。三尺盆袖清照影。五更窗月默傳心。更煩細看門前水。昔日西流何似今。

其二

寺分三集易披尋。藏在名山意亦深。但與止茲鸞鳳友。共逃不學馬牛襟。年來惟以睡過夏。老去莫令詩嘔心。欲見文章須近北。太平風雅盛於今。

約鄭公續出城

顏厭低頭看文字。似曾有約到南山。稍回妍暖日自喜。掃盡積陰天解顏。便合與君聯騎出。更誰如我兩人閒。相逢莫作傷時狀。且趁春光競往還。

寄江東故人

北風號木造秋悲。書到江南九月遲。鵬過宜頻問消息。詩成猶得慰相思。想當雨澹煙昏處。又見橙黃橘綠時。若到北山煩寄語。道林真覺乃吾師。

冬前雪珠夜下早閉遠山皆白

夜深真可覆三甍。地僻何因致八綿。五嶺盛傳非昔日。一寒如此怪今年。固知淵客難藏寶。倒卷珠池立散天。日下有丹能變白。青山休恨早華顛。

雪作兒童以衣袖盛之如柳花狀



六花幾歲不來南。大似優曇欲遇難。瓦響急傾蛟淚夥。袖寬先得柳花團。莫憂荔子明年少。已是梅英向臘殘。骨冷魂清北風裏。更臨江檻俯驚濤。

龍山送客

茸茸風草弄春柔。密密桑陰向綠稠。江上星居多草閣。波開斗轉一漁舟。吾行適此心無事。客去何妨刺漫留。尙戒奚奴休叱馭。不辭小住看潮頭。

煩人置葛

飽誦韶州白葛輕。十年曾不慰前聞。芰荷欲使風裳製。谿谷難襄霧縠紋。坐飯遭炊無可避。踏冰赤腳謾多云。試將一事煩吾子。粗絺精絺可細分。

七月一日夜坐觀星

半夜涼生過雨初。起迎秋色掃庭除。西牛東女經年會。北客南風一笑踈。乾鷄悲鳴橋渡漢。龍泉騰躍氣凌虛。盆池水面螢飛過。上下天星總一如。

七夕後一日諸公攜酒見過

昨夜天孫擁翠幃。餘光猶此照河津。且欣大暑去酷吏。更辱諸君爲主人。庭桂釀花香有信。盆荷迎露綠長新。浮雲掃盡天無滓。仰面爭看月半輪。

送范潛子僮

乃公乃祖帝王師，勳在周家日月旗。德盛固宜長有後，材高如此用何遲。五更雨腳方收絕，六月雲峰正出奇。好去加鞭度梅嶺，及時功業繼前規。

丙寅十日遊南華

五年四轉入曹溪，飛蓋千霄日爲低。人室忽聞鐘不暇，飲香休問水流西。桄榔子熟旒珠重，苴苴叢深扇羽齊。鬱鬱蒼蒼千嶂裏，犯寒猶著一蟬嘶。寺通聲理·近僧宿·西流·

大隱寺遇風

舟絕清江鱗老榕，杖藜小住翠陰中。縈青繚白千山日，駭綠紛紅萬竅風。足倦要休憐地僻，心閒無事見春工。回塘大有田田葉，索酒來傾碧玉筒。

夜宿方允迪別雨亭大作

肺附羣山襟帶江，近人鷗鳥日成行。每來問道維摩室，何幸濃薰班氏香。雨腳雪花方開作，燈紅酒綠正爭光。更煩采選消長夜，坐看回旋穴轡忙。

觀湖

海山不見兩螺青，但見橫江展玉城。動地鼓聲飛屋瓦，刺天鱗鬣闖溟鯨。拍浮未見羣兒弄，借勢須令萬楫迎。俄頃日斜風欲定，向來元是一瀉生。

寄諸洪

彭蠡春生萬頃湖。光明相映棹華舳。鷓鴣鴛鴦俱爲鳳。乳酪醍醐總是酥。歸壽其親來繼踵。無求於世獨知吾。青天一紙鴈數字。南北雖殊意不殊。

次韻俞路分見寄

有田二頃復何求。長恐斯文久不酬。青竈正堪煙雨笠。白文終返水雲裘。相親多謝風標子。可欲豈無蕭灑侯。更下疎籬對君弈。要觀都大出基州。

其二

龍尾道南初見子。炯如玉筍出瑤林。別來東海記三淺。歌罷武溪同一深。後五日看真得力。前三語且更留心。平生著手枯桐上。會有人能識此音。

戊辰元日到南華

清曉匆匆賀歲歸。又隨微雨渡曹溪。禪時願見五色羽。揭戶方占一日雞。沙水半搖新略約。雲煙深護古伽黎。曹源激水仍過額。桃李無言下有蹊。

書事

春來何事可相關。撥置書叢得少閒。洗硯諦觀鸚鵡眼。焚香仍揀鷓鴣斑。花開北陌東阡外。人在朝三暮四閒。俯仰乾坤了無愧。心如枯枿更誰刪。

遊錦石巖

梯空何事上秋旻。要定三巖著隱君。斗柄下垂星可摘。天門將近語先聞。猿窺虎隱人驚去。牛污龍池雨解紛。慣我七年東向念。却張風腋跨歸雲。巖高百餘丈。頂有龍池。牛浴即死。池中纏有大繩。洗池。王孫極多。見人即驚去。虎隱。巖名也。

遊紫微洞

堂堂勝境久潛幽。經始勦荒用我謀。日照洞門開戶牖。霜飛暑縹索衣裘。鞭笞鸞鳳天將近。彈壓山川酒不休。大費騷人題品力。薜蘿俱挽入瓊瓊。

揖翠軒

案至元嘉禾志載此詩題云余  
揖翠軒山誓照院上方詩凡異十五字

簞笠蓑衣一葉舟。西風吹我與同遊。洋洋盈耳松聲亂。疊疊逼人山翠浮。講罷已聞花雨落。心清暗與妙香投。道人居士忘機久。一飽關門相對休。

戲同諸子書所見

已老猶癡作蠹魚。出門延望立須臾。或深或淺花先後。半霽半陰雲有無。山月向人俱引領。海風無日不嘯枯。論詩各盡諸郎意。籬落之中自可娛。

八月十三夜與張檢法泛武溪

川淨波平五板舟。天開地闢一輪秋。白銀國放黃金色。宮錦袍添紫綺裘。坐久星河挂瓊瑤。夜深風露走珠旒。人閒意適須乘興。我是閒人更自由。

次韻李令

青雲獨上肯隨羣。遇我真成數面親。未許兒童騎竹馬。且看土偶笑桃人。弟兄酬唱詩無敵。賓客過從德有鄰。世味儻教如嚼蠟。便能調鼎證甘辛。

過小市李秀才居

大涵泉東小市頭。川平土沃似中州。誰歟築屋溪山裏。李也讀書窗戶幽。懶覺郊行差自適。老於春事不相謀。他時來問曹溪路。繫馬橋邊更少留。

同郭侯僧仲晚至武溪亭議真率會

平遠寒林暮靄橫。右丞不死畢韋生。八人過處草齊綠。一日去來花笑迎。衲子自知空是色。將軍要使酒猶兵。尺書相與盟真率。嶺海風流似洛京。

鄧提舉留詩南華子後五日入山次韻

有句誰知李似陰。好奇仍許杜猶岑。後期五日來圯下。而壁九年參少林。瘴鬼安能驚鶴衆。地靈何敢著狐任。雷車電熾中宵起。看取龍工濟物心。是少始雷雨。僕居曲江九年。今茲行脚皆以南華多靈聖至。

南華卓錫泉復出

竹韻銜尾轉山房。飲足寒清涵夜長。曾問禰窮目智井。爲焚安息坐胡牀。千山從此俱蒙潤。一綫纔通未可量。六月炎方了無暑。誰知世上有清涼。

次韻常子正

骨鯁當朝迹未塵。但知謀國不謀身。試看犀角龜文表。真是鸞臺鳳閣人。短別可堪馳夢驛。小詩聊爲寫情親。雪山滿眼寒潮急。憑仗歸鴻一問津。

寄洪倅景伯

潦倒齷齪老更癡。手摩枵腹逐兒嬉。處陰息跡真休矣。遇坎乘流一聽之。臘後春生須厲到。花前思發幸梅知。瀛洲學士滄洲興。妙唱一年漁父詞。洪倅作十二月漁父詞。

題足軒

城中寧有一毫真。靜極方知衆妙存。踈受果能從父議。王章終不用妻言。脫身兵火蒙天幸。沃日風濤到海吞。兩頓藜羹如大饗。一番布被有春溫。

元日登城

第一逢春物事。率先桃李被襄嘉。明朝又數日爲狗。回首猶驚歲在蛇。香聚椒盤縈綵字。春生茶椀結瓊花。屏城獨秀東風裏。下瞰川流脈脈斜。

睡起

客不敲門飽睡魔。靜聽簷雨瀉天河。從人指畫竹如意。假手爬搔松養和。屏上水翻波浩渺。硯旁山臥石陂陀。十年游戲三間屋。一笑留連兩曜梭。

送福帥

春到春城和雅歌。又攜春去度雲蘿。過余竹裏煎茶久。看子花邊簇馬多。千里福星臨福地。一時天使挽天河。江紅陳紫留連得。奈此催歸尺一何。

謝劉憲憲龍眼

龍目秋成亦一奇。略無瘴霧指瑤肌。荔枝韻勝材誰亞。益智名同性即非。俠士從禽嚙彈去。鮫人探海得珠歸。不須直待枯成腊。便遣尊前解褐衣。

江上待客不至

煙霧濛濛遠岫埋。沙邊特爲小徘徊。行人又向去處去。客子未知來不來。詩似芙蓉臨水出。人如楊柳待風開。何時見此消愁眼。更肯後期傾玉盃。

寄劉明道

平山飛騎竹西州。到處逢君得縱遊。滿地落花春病酒。一簾明月夜登樓。江帆帶雨人歸後。烽火連天客罷休。一紙短書勞遠視。貂蟬到底出兜鍪。

次韻傅丈見寄

到處能行到處藏。飯餘挂鉢解茶囊。不緣頭上五分白。始與人閒萬事忘。一介遠勞詢近日。十年如此住南荒。只今已是交遊絕。不問比鄰不擇鄉。

其二

土瓜甘蔗窩深藏。二物雨中皆嘗。候春發。青李來禽子在囊。勝日園林吾有分。暮年歌酒爾無忘。掃除金屑不到眼。盡力石田難救荒。每遇北風長引領。皖公山下是桐鄉。

湘江亭別程幹

十年類望秀而峻。琴筑齊音和阮咸。硯浴珍材躬試墨。畫收名筆旋開械。長江流自胸襟出。大編來如首尾銜。分手一言君勿忘。他時容我見千巖。

鄭元亞新居面梅開軒諸子讀書其閒名曰擢英

紛紛百卉不須裁。一見論交正有梅。詩興已從東閣動。山寒併許北枝開。影橫窗紙月爲友。香著硯屏春共來。庭下芝蘭爭秀發。對花君但莫停杯。

江上送客夜歸

江干燕客酒如淮。歸路飛舟破綠苔。燈影入簾窺酌前。雨聲宜夢引吟嘯。豈無文送窮行別。似有人呼隱去來。一念不生無可道。此懷今欲向誰開。

送楊倅致政還鄉

交說紛紛不憚煩。要公小駐北歸轅。三休恐負名亭意。公作題軒於郡園。以示歸意。二去吾寧顧子言。快指柴桑還我里。遙瞻神虎到君門。畫圖史筆俱張大。又得楊家一巨源。

與錢端修諸公飲興福



種陰解盡可信眉。梵宇仍容款扣扉。山淨且無塵一點。湖平惟有鷺雙飛。杯行客惡思傳令。劫急棋爭看解圍。招隱不知誰好事。爲尋幽處著漁磯。

送蘇判院赴江東辟

春風桃李正開花。客路江山亦可嘉。白鷺洲前浪山起。烏衣巷口夕陽斜。一星終矣君重往。四壁蕭然我獨嗟。元祐子孫今用盡。如公豈合在天涯。

端午登郡城得白菊一枝

天外飛雲結晚陰。城頭清吹度虛襟。江山已定南居計。魚鳥休撩北去心。菊早有花千葉嫩。蒲香釀酒十分斟。歸來臥聽黃昏雨。與我猶親一布衾。

寄賀子忱

昔歲裁詩遠送君。如君未可作閒人。那知半紀重相見。全似當時只話貧。推轂向來誰盡力。彈冠從此不謀生。想當六月苕溪上。萬頃荷花一幅巾。

寄婺州歐卿德孺

醉翁遺迹徧江湖。何事東遊不到吳。遂使山川有遺恨。却看孫子步清塗。沈郎帶減傳千古。婺女星高近六符。簪筆便當歸從上。蓋藍鞍錦照天衢。

與林大夫謝靈壽杖

萬木山中美木成。木生此古今靈壽得嘉名。龍鱗未測他年化。蝸角先從每節生。每節生禪擬問來須便打。醉思吟後不妨行。使君有惠憐衰齒。欲報慚非藻思清。

以靈壽杖寄汪內翰

一枝靈木多堅節。千里逢人寄永州。賜出漢宮尊子夏。封當大縣慶鄧侯。衡山雲散迎歸騎。湘浦春晴更順流。欲往從公無羽翼。請攜上座別愚丘。

喜見白髮

種種年來漸滿簪。兒童環視語相驚。故人太半黑頭死。老子何妨白髮生。彈鋏不須誇手熟。著冠猶喜鬢頭輕。元無粉黛居閒屋。任爾星星易數莖。

寄方立義方曾在

西南一柱力擎天。笞鳳鞭鸞下散仙。不憤狐狸成窟穴。亦知滄海變桑田。夢歸丁令鶴飛去。念舊徐公榻尚懸。我是鄉人君是客。興言及此淚如澣。

寄向伯恭

天竺山前昔據鞍。帽義高屋古袍寬。髮雖比舊十分白。心有憂時一寸丹。雲路正看鳴劍履。昔門何早挂衣冠。爲公試草薊林傳。歸日來緝九畹蘭。

次韻江子我病起

食不下咽當奈何。千金不惜聘秦和。則知有我聊示病。旁若無人正浩歌。薄雨過懸醒檻竹。西風吹暑下庭柯。但令一局消長日。且樂眼前休問他。

淵明以正月五日遊斜川。時年五十。予以正月二日遊曹源。年五十有二矣。慨然書示同行。城裏喧呼子不貧。乃能從我就僧談。平明且喜風收潤。仰視只愁雲向南。靖節使年慙過二。斜川推日在前三。吾生大似僧行腳。好問真空覓住庵。

寄方允迪

山陰興盡晚船催。猿鶴歡迎入翠微。爲信在山名遠志。便令滿篋寄富歸。一牀獨設空諸有。三徑就荒知昨非。更賴仲容賢莫敵。竹林從此倍光輝。

雨止讀陶詩有感

涓涓泉溜木欣欣。便覺居閒思不羣。快覩朝霞開宿霧。少休時雨縹停雲。無弦琴上宮商足。有酒篇中醉醒分。誰是知音誰可酌。置琴罷酒對爐熏。

頃種柏假山中黃憲相訪見之後八年黃憲復持節來柏已大長

兩石之閒一寸栽。與君坐看鬪莓苔。蒼官閱世猶如此。歎伯喚人歸去來。飄放又瞻新斧纒。光華重照舊池臺。他時左紐紋生後。更望西遊老子回。

與羅教授飯園中種梔子

園木交陰正可觀，壺觴隨分却成歡。  
綠錢流地雨常足，飛絮暖空春不寒。  
雪糝醱醱綠屋角，香移薔蔔近欄干。  
與君細說爐亭話，強對檳榔茉莉餐。

與郭侯飲園中

穠李晨興著綺裙，醱醱首出上瑤簪。  
此時老子興不淺，且日將軍幸早臨。  
敵手對棋消畫永，中心聞射隔牆陰。  
春生夜壘蓬萊綠，酌我無多勸客深。  
郭酒名蓬萊春。

華幹攜茶入園晚坐柔桑下

光穿雨脚閒形證，聲急城頭集暮鷄。  
且與鳳雛桑下坐，共烹龍焙雨前茶。  
的中薺嫩蓮新採，笋上竿成竹已斜。  
讀得齊民書熟爛，把鋤今作老生涯。

喜雨欲行園

南風轉北遂爲霖，倒掩書帷坐累茵。  
洗沐江山三尺雨，莊嚴天地十分春。  
猿吟鶴舞園雙引，酒社詩壇待五申。  
說我小園增秀潤，使思徐步轉城闕。

園中示客

風急梳松墮碧釵，雨多及榻長青苔。  
趁虛阿段阿稽去，挾策宗文宗武來。  
不用張羅知寂寞，恐妨飛鳥樂徘徊。  
侵尋老矣成何事，一日華嚴一卷開。

園中卽事

出山道士在家僧。晚誦儒書早佛經。灰盡此心猶木偶。掃除往事送芻靈。花邊過客蜂旁午。溪上良時鷺適丁。一到菊坡分品目。玉盤盃可次金鈴。

至後飯客

新陽爲我解憂端。梅破南枝雪造寒。繡刺五紋添日刻。餅炊十字薦春盤。遺排百念有時盡。選迓一尊無限歡。更待小晴擎小艇。蘭漿重酌子陵灘。

送羅巨濟北歸

君才可從六龍飛。便合超騰向日畿。曾使諸生館下立。又騎一馬醉中歸。江山得助雲烝筆。桃李不言春上機。歸去來園花似海。子行吾且閉柴扉。

寄仲彌性祝子權

博士曾瞻稷穆光。賢良猶抱漢文章。江山不隔夢千里。鴻鴈欲歸書數行。蠅變豈能分白黑。木災初未有青黃。遂巡歲晚成何事。捧腹看雛騙不祥。

遊江醫園江避賊歸四年花木皆再種已開花著子矣

避地歸來四閱春。春來草木盡青青。桃花暖逐桃花水。竹葉光臨竹葉瓶。閉戶自求安樂法。活人時說衛生經。移牀卻就溪邊坐。照我新生白髮星。

遣興

衡門秋到總堪悲，荷折蒲荒不整齊。但喜風前無立豹，亦知砌下有蹲鴟。吾徒老矣成何事，生理茫然更久稽。清淨無風天雨已，山前山後且扶藜。

雨後告春亭飯客亭下荷花皆爲釀家入麪久雨類垣方議栽竹代之

半夜簷聲挾北風，平明賀雨走諸翁。山人起向水亭坐，野饈不求行帳豐。勸藥有香蓮不死，落籬無闕竹成功。閒中自有閒生理，促辦牛衣戴此公。此公笠也見王要儉約

有惠益母粉及當歸者

多病年來歎早衰，試憑草木爲扶微。關心藥裏知多少，繫肘方書識是非。曾子定應憐益母，曹公端解寄當歸。從今洗面饒光澤，血氣仍充舊帶圍。

送崔若礪令河源

雙鳧飛出九重關，帶得中原氣象還。抵死欲留之子住，吹笙要伴老夫閒。草荒白鶴峰前宅，雲散黃龍洞口山。茉莉素馨開已熟，妙香從此賸垂班。

醉坐

年來豈復爲秋悲，靜裏端能悶化機。風引飢烏將子下，雨催羣蟻運糧歸。路無車馬閒尤好，粗有詩書家亦肥。更得干戈漸衰息，不辭長採首山薇。

送胡德輝

抗章乞得清涼國。已是無心瑞錦窠。誰去自追戲下信。時來寧免禁中頗。三吳春盡天連海。四月梅黃雨  
壓蓑。倘有新詩求共和。莫辦一騎送羊何。

送果州邵公濟分韻得其字

蓬萊清暑按行歸。卻向西南萬里馳。郡繼尊君家有法。學傳乃祖世無師。曹劉鶻短自今日。班馬香濃如  
昔時。青士在旁知別語。夕陽回首更淒其。

東津送方務德

一年癡雨令人瘦。三日佳晴送子回。何以贈之青玉案。我姑酌彼黃金壺。君春出郭非聊爾。下水行舟亦  
快哉。小試平生釣魚手。老夫合住子陵臺。

寄鷓鴣源方允迪江子我

世閒豺虎正爭岐。隱去何妨九曲迷。懷人夢到北山北。卜鄰意欲西村西。麥雲已有飽氣象。梅雨又煩詩  
品題。他日籃輿入源去。尙期趺坐對青藜。

喜雪

待雪多年久未逢。茲辰如望故人風。稍添松頂三分白。獨露蕉心一寸紅。泥尾可能留鴈使。豚蹄何敢謝  
龍工。不如借取公家甕。著向飛樓縹緲中。

其二

今年吉利好人逢。萬玉妃來各馭風。客坐暖浮茶乳白。夜堂春動燭花紅。心存帝所元非夢。化出天城不用工。卻怪浩歌韓吏部。巧分垺處與均中。

其三

嘉瑞真成一旦逢。寄牋天土託鵬風。分無侑坐歌眉綠。但有挑蔬凍指紅。畫史莫傳飛舞勢。詩人俱盡琢磨工。此間不見乾坤妙。妙在松扉山嶺中。

分宜縣舍夜遇大雪

揮扇解衣真早計。果然一夕變春陰。屋頭瓦裂風掀戶。牀上珠跳雪滿衾。我自不妨高枕臥。人今更有惜花心。此行特地非乘興。明日扁舟興亦深。

元日會凌季文家

伯達勸酒僕不能滿。胸輒明潤。庭播爲醜。壁間燈照。樞影如畫。雙頭盃。戲伯達云。

柏葉椒盤巧試新。大呼珠履集華茵。香醪酒勸橋爲醜。紅燭未消梅寫真。荔子雙頭歸有遺。天花六出靜無塵。稍晴便合西湖去。尋徧山房洞戶春。

春遊

久不出門心已灰。作晴作意苦相催。爲花世界共遊戲。竹石弟兄仍往來。心有所之無遠近。興雖已盡更徘徊。江邊漁父傷時切。得遇郎君笑口開。

示同會

案此詩。方圓。律。增入。



無奈春寒老不禁。喜看晴日上窗櫺。羣花半露乾坤巧。百刻平分晝夜停。拄杖有時挑菜甲。桔槔無復問畦丁。逢春不出何爲者。衆醉誰知可獨醒。

簡范信中

天下皆聞公子賢。輕裾長袖更爭妍。青春自向東山好。下客空懷代舍遷。生活不甘詩冷淡。年光專用酒留連。直須萬里騎黃鶴。俯仰安能在一椽。

正月十四日西湖留別同舍

背淮懷楚過三吳。鐵軸齊輪每疾驅。千里未能歸北客。一鷗來此別西湖。門門燈火動今夜。步步溪山迎故吾。明日歸潮君看取。浪花堆裏嘯橋烏。

正月二十日過江氏園

宛宛橋虹臥碧澗。深深古屋背長川。園官送菜無虛日。溪友留魚不問錢。歷數舊交俱老矣。及時行樂且欣然。梅花更有黃千葉。攜取一杯花下傳。

三月五日游劉光世園

南高峰下訪餘春。霽草浮光暖更熏。日轉暮山添著色。風旋湖水作回紋。飄零大士天花雨。驚顧將軍棗棟雲。興盡不須呼麴友。他時來飯一瓊芹。

閏月四日大風出靈鷲捕魚具脰且約冬閒再集

西北雲收廓太虛，東南風急放船初。冬深更許侯設鱸，地遠不識公矢魚。白小未容登燕俎，紅鮮忽已開嘉蔬。重生鱗鬣浮江去，盡是先生所棄餘。浙中有鱸魚，俗所謂銀魚是也。

陪董令升西湖閱競渡

馳波鬪艦疾輕鴻，歌鼓喧天保歲豐。直面北風吹雨過，卷簾斜日照樓紅。吳兒戲水用長技，太守行春如醉翁。社稷中興豈無日，翠魚躍水正飛空。

其二

行樂何妨縱水嬉，勸耕猶喜及花時。風和官柳未飄絮，綠滿園桑無附枝。訓練指麾談笑裏，清涼肅灑古今宜。西溪雨足歸舟穩，會送高帆入鳳池。

三衢胡定愍祠

把酒論詩建業城，三年金石見交情。羅池忽待中流泊，姑蔑應無劇雨傾。直道豈知人負我，英姿如在死猶生。鐘香銷盡叢祠晚，獨對西風淚應橫。

買田瀟溪

求田得處便成家，笑爲汗邪祝滿車。漱石枕流新夢想，帶牛佩犢老生涯。歌成但可相舂杵，客到莫嫌炊飯砂。祭罷土龍春雨應，穩騎秧馬一鞭斜。

過烏龍嶺

羣山低首避烏龍。行道驚看翠倚空。地設中原如此險。人無鬪志若爲功。九重頗覺天門近。一卒能當蜀道雄。細酌粉泉菴下水。冷然歸去御剛風。

晚晴步謁楊令於烏龍寺

舉頭廓廓見晴嵐。山色秋光得自如。杖履可行三里近。斧斤不赦萬松疎。上人坐設刀圭飲。乃祖家無儻石儲。語罷寒溫晚歸去。相逢應不問蓬除。

離臨安日范伯達送茶約至釣臺烹之正月十八日宿臺下兼簡務德

過盡長灘喚落帆。舟人取火上高巖。已攜敗絮來投宿。記有珍茶旋啓緘。忽憶往時同知艇。要須於此辦長纜。可憐一夜梅花雨。點滴猶隨舳尾銜。

釣臺觀新刻范文正碑

日角曠曠上蔡陽。有星飛去避餘光。東西休迫謝新進。南北逍遙樂故鄉。載刻廟碑求琬琰。一新祠宇照滄浪。使君著意敦風俗。更作高堂騁文章。

競秀閣此詩錄嚴州府志增入

朝川遙展右丞圖。盤谷中藏李愿居。龍睡潭深飛客櫂。鳳鳴枝老結吾廬。但令蠹屐去前齒。安用鷓鴣託後車。西望子陵三十里。煙雲來往問何如。

遊玉泉

坡陁石上大紳垂，蹶石跣跌世慮微。牽引有春扶屐去，送歸無月帶星稀。一時花木助歡笑，四顧風雲入指揮。是日乃嘗驚蟄節，鳴蛙已傍小池歸。

其二

款段尋山不著鞭，每逢佳處且周旋。生無一字誇金谷，喜與諸公會玉泉。雷轉正噴三級浪，紳垂直自九重天。有能庚伏留終日，大勝朝堂食萬錢。

立夏前一日登馬氏山亭

百憂不到酒三行，萬事盡休棋一枰。梅子未黃先著雨，櫻桃欲熟正防鶯。忽驚夏向明朝立，便恐春從此地更。數蝶飛來花寂寞，亂蛙鳴處水縱橫。

夏日登葉氏山亭

雲氣向曉不待族，風伯忽來吹使醺。溪南溪北半篙碧，荷葉荷花一段奇。旋扣柴荆行閒道，少休松檻坐移時。淵明志廣桑麻長，此語勿傳朝市知。

題翠波亭

天垂疊嶺翠相交，風展文漪碧半篙。勝日難逢宜樂此，好山多買不爲饒。了無歎息同登視，忽有會心如在濠。更看溪光山色裏，紅霞蒸起萬株桃。

七夕日遊仙人洞

蟬引秋風上桂枝。登山臨水不勝悲。獸蹲虎踞石見怪。天劃神剗洞出奇。無復碧盡雞刷羽。空餘青栗蠟攢皮。儻分衲子三椽屋。當與仙人五日期。

晨光亭夾徑草深菴僧澄鋤去之將種桃李

徑荒隨處長蓬蒿。忽告通幽且盪蕩。已問花翁移郁李。竟從金母折蟠桃。住庵事簡吾何力。種樹功高子有勞。吏用公材當小試。把鋤來趁雨如膏。

晚步城外

芒履寬柔野策輕。晚來無暑步重闌。人閒爭夢大槐國。物外誰尋小草民。一鷺緩飛爲我伴。半川鋪練寫余真。何從可覺秋消息。忽有涼颺到白蘋。

冬至後三日與羅楚入作廳兩松下梅花盛開取酒酌石臺上思得名手作松梅圖

老松鱗甲待擎雲。俯視梅花意亦親。粉色上參冬嶺秀。蚪枝下挽越溪真。乘閒到此能終日。與我來遊盡可人。今代華光古章畢。生綰一幅兩傳神。

再次前韻

匆匆前日賀書雲。那似今朝笑語親。年例一來窺雪樣。歲寒同此見天真。梅開蜂陣長圍日。松下鶴蹲反嚇人。一碗雷茶未忘本。三杯薄酒不能神。

冬至後雪夜

臘前梅葉未斜橫。至後醅香試滿觥。過眼文書開數葉。打窗風雨又三更。閉門高臥直差易。擁鼻微吟何似生。稍取濕薪供熟弄。住山如此不多爭。

送鄧清臣之行在

老去何嫌雪滿頭。放懷惟與子周旋。起趨吳越時難得。上繼張余理必然。嶺海斷雲歸鴈底。江湖春浪白鷗前。故人相見問今我。雨笠煙蓑事力田。

# 澗山集卷三

元宵懷都城簡胡令俊民時胡連夕在告

天籟晴光合。簷收雪汁乾。燈期欣在候。火令不爲難。方喜春風動。猶憐暮色寒。仙晨今夜樂。帝所儔年觀。  
郁郁卿雲密。愔愔瑞氣盤。五門雙闕聳。三島十洲攢。風伯清黃道。鈞陳衛赤鸞。擊流車水決。花影樹龍蟠。  
入望雲裳舉。低迷雜珮環。歌翻樓上下。人與月團圓。夜色清凝露。香風靜泛蘭。陸蓮搖豔質。湯鯉轉驚瀾。  
故國雲天外。家風楚俗完。良時亦競作。游興頗相干。諸縣豐登際。元戎禮數寬。輟耕來野父。沽酒辨餘歡。  
少問飛鳧客。遙知道室安。樞青能笑語。太白酌瀾漫。要是弦堂必。何妨花縣潘。黃庭須默課。燈錄不重看。  
羨子閉門坐。嗟予腳力殫。醉歸哦五字。一一待公刊。

南華五十韻

鄉里黃梅接。家居祖剎鄰。常聞肉身佛。甘作磴坊人。堅有懸腰石。空無拂鏡塵。已春諸米熟。自識本心真。  
拄杖敲頑質。袈裟遠淨身。衣傳千古信。法待五年伸。撥棹煩師送。投林避衆噴。風幡俱不動。金瓦定非倫。  
汝聽宜皆諦。吾言決可遵。由茲開頓教。爲世作良因。葉墜雖歸本。爐斜不向新。鈴聲鳴白塔。霧氣走黃巾。  
塑手藏衣襲。閻姝敗鉢唇。全提諸佛印。開盡一花春。代代燈燈結。應應剎剎均。性天南北合。道德帝王親。  
歌鼓昭陵日。梯航外國珍。莊嚴及山谷。賜予出金銀。龍蠶開飛帛。春溫布縝綸。鎮安清淨境。奔走護持神。

樓閣三千界。香燈十二辰。蘇銘模妙墨。柳記刻豐珉。自昔炎荒地。常容放逐臣。流人悲去越。從者病居陳。庚子何憂鷗。春秋謾感麟。足生行路蠶。眉結念親嚶。卜吐千瓶水。官分十束薪。九韶先幸舜。五嶺後通秦。氣候今無瘴。人情古亦惇。何嘗踈壯客。賸喜預嘉賓。鼓角催歸夢。江湖勸釣緝。時花開有信。山果種生仁。武水長懷古。曹溪每問津。端居七里郭。相望一由旬。抱被來投宿。聞鐘起及晨。自憐終北向。天遣試南詢。竟日雲垂地。通宵雨澌茵。橋橫一滴上。省見五方馴。飛錫泉香發。連山寶氣振。杖尋桃竹把。佩采楚蘭紉。大禮行郊次。洪恩浹海濱。稍寬三面網。歸作再生民。甫里將收粟。松江細煮蓴。橋懷工戲綵。萱背更栽椿。風急團雲絮。霜清洗月輪。治行今數日。問信不嫌頻。三宿真成戀。諸寮且遍巡。鬪茶誇顧渚。羨芋說西岷。寺有壇經舊。誰知祖意諄。持歸化嶺北。大地免沈淪。

送吏部張尙書帥成都一百韻

并序○案序跋從成都文類補錄

己未九月。有旨謀成都帥。三省具所除人。以聞。皆不許。止命選在廷從臣以往。衆未及對。上曰。得一人矣。吏部尙書張齋。明練端方。可當一面。付以便宜。勿從中覆。且命退與公議。公見宰相。願行不辭。乃以十月六日制下。吳蜀相望一萬里。水遶瞿塘滙。陸走夔峽極。天下之險。有爲公言者。公曰。上用我。何遠之辭。何險之畏。退理舟楫。行日甚近。於是士大夫不問識與不識。皆謂公宜在朝廷。不必往成都。成都可他擇才。朝廷不可無公也。御史中丞具以輿言白。上。夫內重久矣。一命以上。皆以不得仕朝廷爲恨。公卿出典方面。類若不得已者。其進退用捨。士大夫亦不甚留意。今公欣然承命。無



一毫難色。而又得士論如此。此行有光矣。蜀有兩張太守。太宗時乖崖公。仁宗時文定公。兩公名重一時。爲人君所倚信。在蜀最有惠愛。蜀人至今祠之。今公姓同。德又同。名重一時。爲天子所倚。又同。惠愛所加。能使人久而不忘。懸知其必同也。旣行。祖道西湖上。朝士咸爲賦詩。翌從公游。將三十年。蒙公之知最深。故爲詩千字。敘公出處大槩。且使蜀人知公不減前兩張太守也。紹興九年十月二十五日序。

一代亭衢上。明公逸步超。河東書具作。圯下老相邀。海闊雲垂翼。天清斗壓杓。三人前鼎甲。千佛仰孤颯。弟子師尊董。諸儒稱述蕭。西崑收俊乂。東壁絕塵囂。別乘將離汴。輕舟選指荊。湖山縱清美。家國尚飄飄。慟哭天傾柱。歸情戶見蛸。奉祠投里閭。招隱向山椒。竝海屯千衛。披榛拱百僚。回鑾須故國。負約且今朝。光列哀烏位。星馳封馬輶。賢裾來接武。陰沴自潛消。香案依丹陛。螭均立紫霄。飛鴻九天去。歸鶴一聲嘹。主上思圖盛。王人促見招。起居還左史。議論鄙南朝。大呂聲揚遠。元圭質匪雕。掖垣裁詔密。禁路賜纓彰。滅澆圖興夏。巡方首從姚。自南瞻析木。直北望元枵。玉海千尋浪。江南五色鷁。矯如出塵阜。凜若在秋鷗。去國遺追信。刈章豈易堯。光華司馬甲。整頓路車條。國事煩參決。廷詢得具條。乘時笑乾沒。許國敢輕佻。河洛干戈滿。陵原草木焦。青春深仗節。久雨更乘楫。取道先轅楚。揚旌轉渡瀟。不坏藏萬世。九廟正三佻。遂使儀如漢。將令樂奏韶。路迷彪過迹。澗涸夜生潮。去日春仍淺。歸期暑正矯。君王喜不寐。天下首方颯。疏奏中無隱。臣生苦不聊。戴天那忍共。得地豈宜驕。內治今當亟。高名不敢要。銓衡真有託。啓事復何遑。

道直咸推汲，謀深豈計疑。定非揮扇羽，寧要插蟬貂。褒貶書方舉，姦諛骨合銷。懷開真坦坦，燕處自天天。  
 嘗宁西南顧，常懷參井迢。徧詢醫國效，立遣愈民瘳。文武資兼稟，詩書氣不挑。衆皆可卻殺，一以委張昭。  
 除日凌巖下，行裝即日揆。被擄猶刺刺，涉遠乃儲儲。帆影三江水，車聲萬里橋。丈人峯嶽岷，神女峽岩巖。  
 石室畫閣淡，草堂人寂寥。山圍玉壘峻，水減石犀遙。石表笳雙立，銅青柏未凋。錦江喧士女，藥市混仙樵。  
 劫墮乾坤壞，流橫海嶽漂。惟茲井絡外，依舊角弓弔。自昔三刀夢，多傳五袴謠。威餘嚴僕射，功說李文饒。  
 文定業尤美，乖崖福可徵。事今難悉數，公亦豈其苗。秦地新通棧，瞿塘穩泛橈。虎貔環外圍，驛馬得深礁。  
 正可供壺奔，隨宜列鼓簫。蒲鞭東高閣，竹馬戲垂髫。好悶相如賦，終聞李廣刁。奎文天象轉，延閣士林標。  
 此去廷無愈，行開衆還陶。付之樞極運，咸仰太階霄。賤子無三徑，平生有一瓢。老將書蠹稿，時作草蟲嘍。  
 大笑玉三朋，不求銀十腰。古今同閩宙，南北信吹濤。已類蜂黏網，真成鹿覆焦。歷經多盜境，幾至獨身逃。  
 何處地堪避，知誰戰敢挑。月明三市鷓，巢下一枝鴛。釣瀨長烹鯉，窮山飽聽鷄。臨書池盡黑，就局博嫌玄。  
 臂有七賢把，丹亡九轉燒。唯堪買薛荔，未肯撥芳蕪。賣藥嫌爭價，爲農等寓橋。稍能羞野葛，初未識江球。  
 已罷尋蛩駝，欣聞退鶴鴒。誰憐人爲米，敢有意遷喬。過我深披惹，追涼薄曳綃。狐裘憐晏子，縵帶與公僑。  
 挽引頰推殺，陶甄爲置窯。清時容潦倒，榮府著芻蕘。憶昨西湖上，隨公羽蓋飄。青山迎管屐，綠水泛吳船。  
 上相尊仍美，將軍勇正饒。道爭基屢覆，壺響箭呈梟。茶乳晴光發，香雲淨更飄。晚花棲嫩菊，近岸俯游鱗。  
 四望天連水，羣簪玉及瑤。政親連榻坐，倏見錫戈瑯。良月霜楓冷，佳晴雪霰銷。留公已無策，鼎食望加調。

或部。西南大都會。承平分關之屯。與河東北等。元祐初。文潞公平章軍國重事。三  
議其日。而成都除帥。預焉。顯難以來。獨此方兵。不作封。陸白。出。東。擇。秦。南。文。吳。楚  
威。賦。詩。送。行。慎。中。書。舍。人。朱。公。賡。尤。謹。且。備。已。未。既。以。長。篇。遠。公。出。讓。因。逼。且。爲。序。數  
百。言。載。上。親。權。之。本。旨。尤。謹。且。備。已。未。既。以。長。篇。遠。公。出。讓。因。逼。且。爲。序。數  
蓋。如。此。且。居。無。何。朱。公。賡。尤。謹。且。備。已。未。既。以。長。篇。遠。公。出。讓。因。逼。且。爲。序。數  
而。通。之。且。請。伐。石。志。之。而。蜀。公。之。客。仙。丹。譚。篆。戲。之。而。

### 宣城書懷

高爽清涼郡。登臨佳麗都。上連三蜀重。旁挾兩淮趨。天分光牛斗。溪行走舳舻。新林天際浦。青草柳邊湖。  
丁令鶴歸晚。琴高鯉疾驅。高城布渠答。近市表浮屠。親具深耕雨。牛車富入租。鐘魚廣教飯。簫鼓敬亭巫。  
縹緲請俱先。詣齋修必盡。愚虔恭問杯。瓊疇昔夢擣。蒲桃李萬家。邑魚鹽百賈。區區禁爭三。品勝錢爲七。郎輸  
湖上同皇甫。樓中記獨孤。五雲裘可作。天馬錦應無。射的穿雲白。蓮房照水烏。山精今及采。鷹爪得同拘。  
右史隸題榜。太和存漏壺。鬪牙虞吏像。衣褐卯神圖。蠅走收宵螿。蜂謹保穴窠。泉甘黃蘗舊。茶雋白雲諛。  
幽寂谷留馬。凌歊舟若鳧。山登天柱石。沙暖句溪蒲。洞啓三天祕。灘愁六刺迂。輕煙藏石女。微雨浴花姑。  
半夜笛聲起。臨軒桂影敷。謝公亭別范。孔子井猶洙。舟起鷺前導。橋橫龍未零。子安飛遠近。杜宇訴朝暉。  
示爽歸田約。懷冰灑篆娛。白公謝霞綺。荀媼進彫胡。神王能旁達。心閒免外虞。白龜飛入楚。赤鳥棹通吳。  
孤枕喧鼯鼠。南亭聽越姑。百先紅毯貴。俗尙褐袍麤。蟬蛻裘丞相。聽明陸大夫。劉詩送拄杖。班傳出葫蘆。  
露柱從師指。金杯受賜殊。漢書國史法。心要藏經郗。鮒活有奇術。錦還真夢驅。苦心思懿老。一鉢走元孚。

潛隱大中主，躬行外域膜。儲神天北極，繫念水西隅。內屏如來地，當陽造化爐。千年猶可想，一絕定非謬。  
 昔在中書省，親聞大禹謨。士階臨黼座，文石上絲絢。紅邊當階藥，陰留一院梧。不才持史筆，有愧但書廚。  
 卜築隨組徒，囚山與鵬俱。忘懷從北院，歸命只南盧。作賦先招隱，移文卒謝逋。晚歸真發覆，豈意辱噓枯。  
 黃屋南巡岳，侯圭舉會塗。時持莘野鼎，來采會稽菰。聖主新更化，羈臣首辨誣。書修天祿閣，游政道山儒。  
 汨沒顏容改，因循歲月徂。此生甘泛梗，餘論許分符。節近書雲日，輪驅畫鹿朱。川華冰片合，山曲臥屏紆。  
 入臘占三白，登雲展七扶。人家多露積，村鼓不鳴桴。身奉三年最，魂收一紀逾。可無人歎息，粗免鬼挪揄。  
 夜引星朝斗，晨瞻日出嶠。兩旗歎潦倒，五馬忘崎嶇。嚴灘猶如陸，崑山恐是蘇。深憐百口逐，只辦四方餽。  
 旋粵魚千里，彌縫金十奴。何如今守腹，猶愧舊官呼。笏有看山拄，歌無擊缶鳴。江山真肺腑，魚鳥自葭葦。  
 正賴管城子，能招墨客徒。李梅詩格律，斑竹政規模。事省囚寬繫，年豐酒易沽。近分天驕傲，遣牧決波驢。  
 苗穠申軍法，善賞奉帝俞。校旗推妙手，嚼鐵視張弧。杼輒絲雙繭，篋包米一桴。遇風專戒火，聽雨甚憂圩。  
 酒盞輕旬把，歌茵特地鋪。賜金誇魏絳，願曲少周瑜。碩果園林密，春山雨露濡。木瓜紅鑊體，銀杏綠勻膚。  
 栗發風前罅，柑垂霜後株。蟻侵梨釀室，盤走芡圍珠。野蕪多將蔣，春盤細翦萸。誰同九日菊，難得一枝萸。  
 水閱尋魚鷺，沙連合陣鷗。愛閒多閉閣，因事或操觚。敏捷漸銅鉢，工夫體纒轡。僧談曾接會，老境合師壘。  
 蜀月重重鏡，松風一一竿。飢食佳境蔗，旋贖早秋鱸。本是煙霞病，何疑山澤癯。計難出柏馬，收必在桑榆。  
 舊事論新事，今吾非故吾。意中不足致，身外復何須。朝市安能隱，田園久已蕪。斯言誠有味，端不減醍醐。

陪崑山邑官遊慧聚寺

日暗蒲鉞綠。風回柳影圓。好山如有舊。勝事頗相牽。紺宇欣留屐。炎官快著鞭。神工盤岌業。妙手活蜿蜒。  
奇甚梁唐迹。偉哉張孟篇。皆寺中事。故人逢異縣。舊話說當年。留滯江湖遠。驚呼歲月遷。還同一笑樂。相與  
對牀眠。筆向晴窗染。名垂漆榜鮮。味腴知茗勝。勢猛覺葦仙。飛蓋干霄上。危欄挂斗偏。腰雲雲掩冉。待月  
月嬋娟。二軒名。石鏤珍珠怪。杉重翠幄妍。迎風拳乳鶴。盡力叫餓蟬。雨腳斜侵戶。湖光遠拍天。徐澆白玉釀。  
笑折水晶蓮。時節酒中過。襟懷物外緣。安居豈城市。避世必林泉。好乞彈丸地。聊成癩疾煙。山祇應許我  
木杪架飛椽。

再次前韻

日走瞿曇宅。殷勤問覺圓。荷珠翻雨碎。符帶逆風牽。安步穿芒屨。長驅斷蠟鞭。臨深呼闕玉。騎氣道蜿蜒。  
前後幾人到。高情五字篇。翻翻遺濁世。落落度長年。斷石崖峰出。喬枝谷鳥遷。端爲逃暑去。復作拂雲眠。  
心曠風林豁。膏乾栗几鮮。丞方有公事。尉亦從羣仙。倚玉吾何幸。棲雲志未偏。久知情澹泊。不夢翠蓮娟。  
晚日斜吹綺。新詩欲鬪妍。微行窺沼鷓。孤坐蛻枝蟬。俯視千章木。如臨尺五天。韻高巾墊角。飲痛蕪垂蓮。  
小築堅前約。茲遊定昔緣。欲誇山笠髻。安得思流泉。卻恐樽無綠。羣憂鬢不煙。誰來助清興。吹裂笛如椽。  
次呂居仁九日羣集韻

衣冠交上郡。氣象有中州。九日一尊酒。千巖萬壑秋。星方聚吳分。魚已躍王舟。卽事感今昔。乃情無去留。

憂時俱出力，濟勝合先謀。北望邊風凜，衣戎詎敢休。

蔡倅羔羊齋二首

有生不釀羔羊酒，無日不誦羔羊詩。賢哉蔡子勇成癖，自勵要如三代時。

其二

盡輸精白承休德，政用詩書造太平。略爲周家推在位，太顛闕天散宜生。

題李成山水

好山誰定識真形，蒼白山人眼最親。半夜忽聞遺有力，中書君召主林神。

題陳幹燕公山水

電眼觀山老更真，能分天造一層層。直須擘華尊瀛手，始解鋪張入刻藤。

石芥二首

古人重改陽城驛，吾輩欣聞石介名。風味可人終骨鯁，樽前真見魯諸生。

其二

長安官酒甜如蜜，風月雖佳懶舉觴。時送盤蔬還會否，與公新釀鬪端方。

山芥

濕帶青煙古澗濱，氣含石理助芳辛。山中酒醴涼生腦，乞與文園渴肺人。

南山觀雪二首

入山初與雪雲俱，坐定雲收雪亦無。不見舊時蒼翠色，換將粉墨作新圖。

其二

南遊客上妙高峯，拄杖敲冰袖障風。卷起面前簾看雪，煙鬟渾插玉璫瓊。

次韻書事四首

西風昨夜入庭梧，況味今年似舊無。想見防秋有長策，幽人真欲反吾廬。

其二

聖朝始悟文章弊，大霑首更詩賦科。白草黃茅供一掃，英豪人物未消磨。

其三

熙寧事作崇寧樣，嘉祐政爲元祐師。但得至誠行號令，坐令風俗似當時。

其四

當年司馬溫公力，今日宣仁聖烈尊。哲后在天何愷喜，要令元老雪沈冤。

天申節二首

南來欣遇千秋節，北向空馳萬里心。永日清風吹古寺，一杯聊見祝堯深。

其二

明慶曉班僊百辟，鈞容仙部下層霄。如今獨立薰風裏，卻聽羣仙奏九韶。

南華書事四首

珍重南華五色禽，雲棲霧宿見無因。雨中恐懼翩然出，我是閒人非貴人。

其二

萬木杉從一寸栽，參天次第可推排。他年空翠橋邊路，來選承天八柱材。

其三

真覺止能留一宿，桐鄉今已住連宵。卻將膏雨下山去，聊助南溟早晚潮。

其四

夾樹繞春明躑躅，紫羅囊筆綴辛夷。花枝照眼蒙清潤，帶雨遊山亦是奇。

曲江漁者得鱸魚乘之目爲師婆魚二首

巨口細鱗初出網，鱸皮玳瑁乃同班。了無骨鯁人人喜，更憐鹽豉發笑顏。

其二

溪友漁翁忍棄捐，卻應游泳得長年。退方未識珍羞貴，不道楊憑已得仙。

夜夢采蓮

榮辰悲歎翻覆手，競呼穴轡欲求功。大開眼作人閒夢，何況真成一夢中。



惠崇蘆鴈

我是江湖一漫郎，鴻飛鷺宿見行藏。西風吹盡蘆花雪，水驛雲程未易量。

謝譚南恩寄六日龜

無了禪師割草萊，清江使者六眸開。我今築屋虛空裏，亦復蹣跚出海來。

乞雙峯山頻婆果二首

我昔南遊三眼國，逢人一笑啓丹唇。祇今重到孤峯頂，依舊丹唇一笑新。事見華嚴三眼國。比丘唇如此果。

其二

我聞如來有佛眼，結子成時速寄來。從此慈悲脩廣口，得爭開處便爭開。類變。一名佛眼果。

延祥寺手植竹有甘露二首

聖主尊賢方側席，此君凝露美如飴。形容盛德齊生事，請對佳祥著好詩。

其二

穰穰天洒被脩篁，的皪枝開日射光。豈爲炎荒多熱惱，故教灌頂作清涼。

月下對白菊二首

詩人月下見梅花，著力形容極口誇。若使月明中見菊，欲將何語爲褒嘉。

其二

飲冰嚼雪傳延年。要比嬾宮桂子妍。忽遇常娥蒙一盼。桂花未敢著鞭先。

佛頭菊

我杖常扶佛面強。我花今見佛頭香。靈山會上曾拈出。一笑懸知是飲光。

金盃玉盤菊

玉盤金盃世稱珍。天酒瓊漿曉自盈。天爲我貧都乞我。我雖不飲亦關情。

桃花菊

菊花忽作桃花面。放眼難看九月黃。花不見桃惟見菊。又將紅雨學啼妝。

雪見羞

菊名

白如白雪復何加。豈有寒英勝六花。真是嶺南稀見雪。花光勝雪喜無差。

睡軒三首

意馬心猿不用忙。睡鄉深處解行裝。華山聞有希夷子。安得斯人與對牀。

其二

諸公對弈我高眠。此法非人不可傳。四腳碁盤皆黑子。孝先從此便爭先。

其三

風和日永飽食已。雨急天寒戶不開。遇此佳時無一事。捲牀高枕聽吟嘯。

謝惠楊梅

杭州金氏越州榜。撒火飛星五月春。百果若重推貢士。風流應不下平津。

南屏三首

百步塔頭長進步。南屏堂上立移時。明明萬象森羅處。鍛鍊雕鐫費我詩。

其二

早來風定絕塵。掃地如鏡窗盡開。昏明四望移遠近。晝夜兩潮分去來。

其三

正當晝永六十刻。久坐僧齋烹雨前。滿園菜花開向夏。一雙蝴蝶飛上天。

寄題競秀亭二首

吳山越嶺老於行。何地誅茅寄此情。直使浮雲無一點。千巖應接始分明。

其二

來往人傳客寢安。問渠何事駐征鞍。只應門外千山好。能使胸中百念寬。

觀烏龍山瀑布三首

一日一夜雨如傾。北山山頂垂天紳。是閒去海只咫尺。緩流何用走踐踈。

其二

五老峯前三峽橋。不論時節聽飛潮。那知冷落窮山裏。忽見晴空練一條。  
其三

漱石漱流俱可意。濯纓濯足且隨時。到江莫作滔天浪。妨我輕舟理釣絲。  
題搓線圖

誰言粉白但閒居。綬補尙煩金十奴。治得棼絲有條理。卻嫌紅女未工夫。  
舍後汚池有小魚數百遷之於江

一泓已脫蹄涔水。萬頃初驚廣莫鄉。且向江湖成自在。幸因風雨得騰驤。  
雪霽捕魚圖

翠魚何日舉舟師。玉海瑤山欲霽時。正是嚴冬當設醴。老翁香飯必先炊。  
園中開牡丹一枝

天下花王都洛京。清明寒食走香輶。東君欲表南來意。一朵焉然尙典型。  
詠紫荆

鶴竹龍筋結露枝。紅綃紫綺曝仙衣。只應不奈麻姑爪。獨領春風住翠微。  
有惠新醬及酒者

拾遺久住浣花橋。生理誰能濟一毫。攜醬藉糟來過我。故人惟有孟倉曹。

聽鶴鈴

蓬蒿門巷久張羅，豈有籠坊重客過。  
天外鶴鈴驚午枕，兒童喚起聽長呵。  
次韻董令升四詠

尋幽亭

帝遣銀河下太微，餘波散透野人扉。  
此行步步有佳處，盤礴孤亭試解衣。

競秀亭


山陰道士頃留連，應接煙雲馬不前。  
君說江南亦如此，我雖未到想當然。

性樂堂

且置紛紛事百端，從公繫馬白雲邊。  
欲知太守樂其樂，山色溪聲得兩全。

玉泉

至寶何年伏九淵，飛空散作玉聲琤。  
那知夜半騰朝采，會見長虹屬太清。



# 澗山集補遺

賦

釣臺賦

導桐川而西驚發清興於孤蓬。覺水石之益隘。疑滄江之路窮。入壺中而天高。渺煙霧之溟濛。三老刺灘。篙絕力殆。猶蹈香林八節之峻。而驚夫呂梁百步之洪也。循江而上。古木千章。山如揜屏。水若奩鏡。雲氣往來而舒遲。竹松堅瘦而鬱葱。遠而望之。物象之平淡豐腴也。其下必有石蘊奇璞。淵涵夜光。不然。隱士高人之所棲止。游從者邪。忽兩崖之對峙。摩萬仞之蒼穹。舟人指而告予曰。此漢嚴先生子陵之所從釣魚者也。能漿落帆。淪湯注茗。再拜三奠。願瞻千古之高風。昔西京之中微。動新室之鑿與。封豕長蛇。恣啖百姓。百姓之怒。盤天糾地。無以抉其憤憤之胸。偉白水之真人。忽乘龍而馭雲。傾天河而洗六合。回炎歷以再新天下定矣。橐矢盡弓。垂衣拱手。晏然端居於九重。思我良友。未知何之。披羊裘而釣於澤中者。是邪。非乎。安居前道。玄纒及門。三聘而來。握手道舊。考文叔之心。猶非天下之至仁也。四五年間。沐雨櫛風。親冒矢石。躬擐甲冑。則亦貪夫黃屋之至尊。樂夫天位之甚崇。取神器如此之力。又安肯捐天下以與賢。故其曰。使其成帝。尚不可得。其視唐堯許由。固知必不能同也。下面三公之位。加以大國之封。與絳灌以竝列。則吾將乘桴而入海。又安能俯伏跪起。束縛以黼黻華蟲也。人之生世。如夢一覺。枕膝且臥。而文叔

不曉。聊加足於帝躬。在天固以爲客星矣。下視世閒。亦聚塊積蘇爾。時出光景。不意驚動夫漢庭諸公也。惟彼東南。有江有湖。有龜有魚。放意煙波之外。吾生蓋已有餘矣。風晨月夕。竿線在手。不避世以爲高。不鍊形以爲久。優哉游哉。深入鷗鷺之羣。而得計魴鯉之藪也。有蟻溪之老人。以垂白之衰容。顧其釣而莫鉤。特見夢於非熊。使文王開丕顯之基。竝十人經濟之忠。豈先生之好異。蓋不能作爲於書章。教民以相攻也。嗟世路之愈迫。悵弋人之慕鴻。終結茅以爲鄰。日香火之是供。清泉白石。聞此言於樂天。曉猿野鶴。計不怨於周顛也。均齋集錄補。

詩餘

桃源憶故人

廣州泛舟送郭景文周子康赴行在

催花一霎清明雨。留得東風且住。兩岸柳汀煙塢。未放行人去。人如雙鳳雲開舉。明夜扁舟何處。只向武陵南渡。便是長安路。

謁金門

道山亭錄張樵老此行在

風露底。石上岸巾愁起。月到房心天似水。亂峯清影裏。此去登瀛須記。今夕道山同醉。春殿明年人共指。玉皇香案吏。

點絳脣

流水泠泠。斷橋斜路。橫枝亞。雪花飛下。渾似江南畫。白壁青錢。欲買春無價。歸來也。風吹平野。一點香



隨馬。

朝天措菊五月

玉臺金盞對炎光，全似去年香。有意莊嚴端午，不應忘卻重陽。菖蒲九節，金英滿把，同泛瑤觴。舊日東籬陶令，北窗正臥羲皇。

生查子詠菊

宮紗綠趁梅，寶扇鸞開翅。數摺聚清風，一捻生秋意。搖搖雲母輕，裊裊瓊枝細。莫解玉連環，怕作飛花墜。

贊

杜子美畫像贊

凌萬乘以崢嶸之氣，貯千古以磊落之胸。筆下有神，洗宇宙而一空者，大哉詩人之宗乎！東帶峨冠，凜然似謁肅宗而論房琯，神閒意定，超然若溯瞿唐而上，泛沅湘而東也。陸居通撰錄補

范文正公畫像贊并序

文正范公，名在天壤，功在社稷，國史書之，鐘鼎勒之，四夷百蠻傳之如神明，天下後世仰之如日月。山澤之儒，嗟嘆不足，仰瞻遺像，再拜而爲之贊曰：

乾綱回薄，妙變四時，有大坤輿，載厚不移，其中哲人，千載一至，其至維何，天地則理，巍巍文正，國之蒼龜。

民之教師。以天下之重自任。故舉萬鈞而若無。以四海赤子爲心。故甘百譏而不悔。垂紳正笏。登泰華衡。嵩之表。活涸澗枯。傾江河淮濟之利。日月有時而食。而公之名不朽。鐘鼎有時而盡。而公之功不墮。唐郭令公之武。漢周絳侯之氣。吾儕小人。手舌俱廢。拜頽有泚。求之夢寐。隱居錄補

銘

蓮葉研銘

玉井之泉。泰華之峯。有十丈蓮。脫葉馳風。化而爲石。淪於深淵大澤之中。蘇以爲研。置之墨客子卿之宮。涓涓之澤。沒世不竭。是爲元穎湯沐之封。而日游戲於其閒。蓋相與託令閒於無窮。隱居錄補

# 澗山集附錄

## 後村詩話一則

前輩記朱新仲舍人天氣未佳宜旦住風濤如此亦安歸之聯取其自然不煩斲削然新仲此等句尙多如拓郭侯飲云此時老子興不淺旦日將軍幸早臨何以報之青玉案我姑酌彼黃金盞凡引用前人語皆蟠屈排募使之妥帖他句如滿地落花春病酒一簾明月夜登樓相親多謝風標子可款豈無蕭灑侯何從可覓秋消息忽有先鋒到白蘋如水篆行科斗林妝嚇畫眉若不經思而俱出人意表讀杜詩云縱之逼論劍收之入檀弓尤前人所未發也

## 後村詩話續集二則

新仲題元英舊隱云五季浪拍天不覆漁翁船語意甚新不犯前人

澗山集多不經人道語此公讀書多氣老筆逾題顏魯公像云千五百年如烈日二十四州惟一人朝衣視坎趨前死羽服行山卽此身與客晚集云足下一來同晚步先生小住待村春春晴云四野綠週春補闕亂山塵淨雨脩容懶軒云經年不濯子春足半月纒梳叔夜頭止酒云稽紳處士議所以將軍貴人須畢之月夜云琉璃虛空甚圓滿紫磨山川更新鑄梅花絕句云姑射山頭冰雪仙人閒一見便豐年卻應羞死琴臺女不得乃翁分一錢荷珠云客來切勿令觀此蓋葺猶能困伏波如大槐小草木偶蜀靈朝采

夜光立豹，躡蹠口伐，手談木上塵，麴先生，千金子，萬玉妃，童欺我老，農報予春，下巖研，正焙茶，皆的對。

善舊續聞一則

待制公朱翌十八歲時，嘗作樂府云：流水冷泠，斷橋斜路，橫枝亞，雪花飛下，全勝江南畫，白壁青錢，欲買春無價，歸來也，風吹平野，一點香隨馬，朱希真訪司農公，載上不值，於几案閒，見此詞，歎賞不已，遂書於扇而去，初不知何人作也，一日洪覺範見之，扣其所從來，朱具以告，二人因同往謁司農公，問之，公亦愕然，客退，從容詢及待制公，公始不敢對，既而以實告，司農公責之曰：兒曹讀書，正當留意經史，閒何用作此等語耶，然其心實喜之，以爲此兒他日必以文名於世，今諸家詞集及漁隱叢話，皆以爲孫和仲，或朱希真作，非也，正如詠摺疊扇詞云，詞見補遺卷予嘗親見葉本於公家，今于湖集乃載此詞，蓋張安國嘗爲人題此詞於扇故也，大抵公於文不苟作，雖遊戲嘲謔，必極其精妙，嘗詠五月菊詞云，詞見補遺卷又與秦師垣啓，雞鳴函谷，孟嘗由是以出關，鴈落上林，屬國已聞於歸漢，蓋秦嘗留金庭，未幾縱還，既而金人復悔，遣騎兵追之，已無及矣，公之行事親切多類此，遂得擢用。

困學紀聞二則

朱新仲詠顏魯公云：千五百年如烈日，二十四州惟一人，又詠昭君云：當時夫死若求歸，凜然義動單于府，不知出此閒隨俗，顏色如花心糞土。

本草菊一名傳延年，朱新仲詩：三徑誰從陶靖節，重陽惟有傳延年。

揮履後錄一則

朱新仲少仕江寧。在王彥昭幕中。有代彥昭春日留客致語云。寒日止數日。開。繼晴。又雨。牡丹蓋十數種。欲折又芳。皆魯公帖。與牡丹譜中全語也。彥昭好令人歌柳。三變樂府新聲。又嘗作樂語云。正好歡娛。歌。葉樹數聲啼鳥。不妨沈醉。拚華堂一枕春醒。又皆柳詞中語。

隱居通議一則

朱新仲舍人。鬻。自號省事老人。初仕汴京。南渡。又仕於杭郡。文采聲華。傾動一時。嘗得其別集觀之。有所作范文正公。杜子美畫像贊甚佳。蓮葉硯銘。雖不及前二贊之妙。然亦奇健。寶銘見補遺卷